

祠


部

集

一







集 部 祠
(一)

撰 至 強

祠部集

提要

臣等謹案祠部集三十五卷。宋強至撰。至字幾聖。錢塘人。官至三司戶部判官。尚書祠部郎中。宋史不爲立傳。曾鞏序稱其爲韓琦所知。常引入幕府自助。今世所傳韓忠獻遺事。卽至所撰。其歷官本末。見於集中者。大約登第後。謁選得泗掾。以薦令浦江。東陽。元城。諸邑。又嘗入爲京曹。從韓琦辟入陝西幕府。其上海北都運。元給事書。所云四歷州縣。三任部屬者。可以見其生平大概。至爲大賢所嘉契。其才品卓有可稱。而所作奏牘之文。曲折疏鬯。切中事情。尤爲有裨世用。杭州志稱韓琦出鎮時。上奏及他書。皆至屬稿。琦乞弗散青苗錢。神宗閱之曰。此必強至之文也。因出其疏。以示宰臣。新法幾罷。是固琦之忠誠惻怛。足以感動人主。而至之文章懇摯。亦有以助之。集中諸體詩。沈鬱頓挫。氣格頗高。在北宋諸家中。尤可別樹一幟。觀所作送邵秀才序稱。初爲鄉賦。舉首賦出。四方皆傳誦之。旣得第。恥以賦見稱。乃專力六經。發爲文章。有譽其賦者。輒頸漲面赤。惡其薄己。是其屏斥時好。力追古人。實有毅然以著作自命者。宜其根柢之深厚若此也。宋史藝文志。馬端臨經籍考。俱載祠部集四十卷。文淵閣書目。尙著於錄。其後遂湮沒不傳。近時厲鶚撰宋詩紀事。僅從高似孫蟹略。方回瀛奎律髓。採錄二詩。而其他均未之見。今從永樂大典各韻中。裒輯編綴。得詩文數百篇。雖原目

久佚。無由知其完闕。而準計卷佚。當尙存十之八九。謹分類排纂。釐爲三十五卷。而稍據其出處之迹。以爲詮次。庶知人論世者。猶得考見其崖略焉。

祠部集原序

幾聖諱至。姓強氏。餘杭人。幾聖字也。爲三司戶部判官。尙書祠部郎中。旣沒。其子浚明集其遺文爲四十卷。屬予序。幾聖少貧。能自謀。學爲進士。材拔出輩類。出輒收其科。其文詞大傳於時。及爲吏。未嘗不以其閒。益讀書爲文。尤工於詩。句出驚人。世皆推其能。然最爲相國韓魏公所知。魏公旣罷政事。鎮京兆。及徙鎮相。魏常引幾聖自助。魏公喜爲詩。每合屬士大夫賓客與游。多賦詩以自見。其屬而和之者。幾聖獨思致逸發。若不可追躡。魏公未嘗不歎得之晚也。其在幕府。魏公每上奏天子。以歲時慶賀。候問。及爲書記。通四方之好。幾聖爲屬藁草。必聲比字屬。曲當繩墨。然氣質渾渾。不見刻畫。遠近多稱誦之。及爲他文。若誌銘序記策問學士大夫。則簡古典則不少。貶以就俗。其所長兼人如此。魏公數薦之朝廷。以謂宜在館閣。然未及用。魏公旣薨之明年。幾聖亦以疾卒。幾聖之遺文。在魏公幕府爲最多。故序亦特反復見之。覽者可推而考之也。其行治官世。已著於誌。幾聖之葬者。故此不著。元豐三年七月五日。亳州榑堂曾鞏序。

祠部集目錄

卷一

五言古詩三十四首

卷二

五言古詩二十七首

卷三

七言古詩四十二首 附錄二首

卷四

五言律詩七十九首

卷五

五言律詩一百三首

卷六

七言律詩九十三首

卷七

詞部集 目錄

七言律詩八十二首 附錄二首

卷八

七言律詩八十八首

卷九

七言律詩七十一首

卷十

七言律詩七十一首

卷十一

五言排律詩二十六首

七言排律詩十六首

卷十二

五言絕句詩

六言絕句詩

七言絕句詩

卷十三

劄子七首

卷十四

表三十二首

卷十五

表三十首

卷十六

表三十首

看詳三首

卷十七

狀五十四首

卷十八

狀六十首

卷十九

狀四十二首

卷二十

詞部集 目錄

狀五十七首

卷二十一

狀七十二首

卷二十二

啟三十一首

卷二十三

啟四十首

卷二十四

啟二十九首

卷二十五

書十二首

卷二十六

書十七首

卷二十七

書七十七首

卷二十八

書五十三首

卷二十九

書九十首

卷三十

書八十五首

卷三十一

書八十二首

卷三十二

書四十二首

卷三十三

策問十首

頌一首

銘一首

序九首

詞部集 目錄

跋一首

記五首

舉詞三首

考詞十一首

牒詞六首

卷三十四

祝文七首

祭文十六首

行狀一首

卷三十五

墓誌銘十首

遺事記一首

祠部集卷一

宋 強 至 撰

五言古詩

次劉才邵送魏彥成韻

國朝廣仁恩。法令去煩苛。三官貴持平。除用不輕可。矯矯魏詳刑。儒術富而夥。餘事及刑書。議論不偏頗。能令舞文吏。無計得掀簸。計其所平反。陰功已堆垛。神方介以福。豐稷報勤播。當卽趨要塗。鳴玉清以儼。誰云出處間。此事難預揣。秋風鄉思動。請郡向江左。猶冀款襟顏。已聞將轉舵。想見桐州民。延首候來舸。置酒樂佳辰。剩插黃花朵。

依韻答吳殿丞應之見寄

古人不可見。空名留竹素。幸而並世生。千里或相去。懷賢我何勞。舊道公其富。老驥伏櫪鳴。使看鶩駘步。浩歌掉簪紱。思極江山趣。西風動遊袂。撇在千巖路。賤子匹馬來。邂逅一相晤。既見豁所懷。私心願執御。論議攻不破。牢若金城固。作詩遺長髯。知異衆人遇。

向負春遊辭。以風雨開霽。既夕樂事未果。因書百言。聊以自戲。

常恨春日少。况遭風雨多。桃李冷不覺。案原本如濁河。廣陌斷游騎。寂不開行歌。方其正雨時。樂事空蹉

跼晴來又累朝。日暖風祥和。紅入桃李枝。綠轉池塘波。何曾到花下。把酒呼青蛾。屈指九十期。今已一半過。繫日乏長繩。欲却無神戈。花若解笑人。謂我前言何。

道旁松

何年澗底栽。移植俯官道。腹空蟻穴衆。枝瘦龍脊裹。斧斤須長材。霜雪豈終老。大有歲寒操。見盡桃李夭。

雷君自陝及門謁與書偕聊成短篇以答來貺

一官偶來泗。舉動畏謗嘲。萬事不掛齒。終日口欲膠。所學未信時。尤欲密斂包。賢者或我顧。未免談屢交。雷侯將家子。而至自陝郊。踵門貺予書。享饋煩絃匏。始見氣頗勁。既語理不殺。愛子欲子薦。言畢徒啁啾。託蔭須高林。而乃依寸茅。盍行游鉅公。一言變魚蛟。

聞杭饑皇祐二年

客從吾鄉來。告我歲大歉。百金易斗粟。富者頭屢撼。餓殍相枕藉。億口盡虛領。客言尙未竟。予淚已成點。避席駭相問。予衷不能掩。位卑俸給薄。用度抑難減。是以之官日。盡室來未敢。予行弟獨留。居常動予慊。歲凶吾產薄。慮其苦粗淡。所以聞客言。私懷轉興感。客遽前止予。君言固足貶。善自憂家爲。微俸誠亦忝。上有天子明。封章日可刻。先陳劭耕稼。次述抑聚斂。澄汰兵籍冗。惇尙土木儉。坐使四海富。寧患食不糗。胡爲所謀狹。而復自戚慘。再拜起謝客。予言愧塵玷。

上知郡都官

列郡二千石。所理我與共。臨淮守最賢。其口交一頌。彼邦困飛蝗。我境欲集鳳。彼民粒不充。我黍地無空。
聲嚴乎如秋霜。巨猾弗得縱。斷乎如蒼龜。吏法不敢弄。鈴齋晝觀書。朱轡春勸種。明堂購衆材。我公實梁
棟。行吐胸中奇。勳名光有宋。賤生何爲者。碌碌備僚從。天幸所與薄。半歲侍羈鞅。鸞雀勢力小。鵝鴈食口
衆。貧賤兩雖甘。瀝懇輒披控。朝廷重爲邑。外臺薦方用。豈惟進寸蹠。抑可利微俸。私心覬公舉。如昔望郡
貢。媒銜士所醜。未罪已自訟。公如飛一章。舉族免飢凍。

呈屯田

溪水日夜落。稍稍露沙面。經旬更不雨。深處亦成澱。巨篙架空航。澀若泝淺淀。況乃載百指。數纜安可綽。
念此歸思發。急踰強弩箭。公如惜滯留。願借長風便。

送藥王圓師

吳僧甚商賈。嗜利角毫芒。或以醫自業。利心劇虎狼。今時愚鄙人。平居恡私囊。寒餓來求仁。一毫不肯將。
不幸病且亟。呼醫計倉忙。惟醫所欲求。萬金弗較量。吳僧業醫者。十室九厚藏。張口待人哺。喋喋厭酒梁。
求其不爾徒。蕭叢揀蘭芳。圓師何許人。出家本衢梁。自圓之先師。三世爲醫王。圓尤得術精。一丸起膏肓。
雖掛吳僧籍。亦吳其衣章。仁義薰厥心。愈彼不願償。人以財啗圓。惡如唾霑裳。晨齋未有餘。一餅蔬充腸。
行囊無長物。秋風藥裹香。昨因赴人急。警然來浦陽。始見已可愛。氣溫語端詳。再見結所好。佛外喜縑緇。
住久見益數。乃知數事長。作詩聊記師。豈曰爲行光。

題婺源胡氏脩然堂

歛山碧參差。歛水綠演漾。之子山水間。築室傲天壤。山空鳥飛鳴。水淨魚下上。觀魚悟至樂。聽鳥悅幽響。一樽泯悲懽。萬事齊俯仰。人境兩脩然。無復塵區想。故人石渠英。緣以命堂榜。作詩羨高懷。中服非外獎。蘇華老名堂且賦詩。嗟今急名人。疾足投世網。心撓跡固喧。求得道已枉。茲理曾莫知。所趨岐已兩。予亦慕子徒。泉石久思往。何當伴琴觴。一鼓東南漿。

攜印謁新守宿至德上方翌日馬上十四韻

攜符拜州守。半舍度微徑。院距邑十五里。有僧謁道傍。云我迓邑令。因徐指叢林。佛宇頗嚴淨。願驅大夫馬。一宿憇征鐙。我生嗜煙蘿。聞此愜幽興。乃留驗僧言。金碧果輝映。捨策游上方。塵襟覺疎瑩。山氣亂朝暮。谷響答鐘磬。清風中宵來。雲斂月垂鏡。微吟不知旦。坐席若初定。遂行登脩塗。回首謝巖磴。咨予秉微尚。碌碌奚足競。一月兩移府。未嘗事府前未暇救民病。徒爲章服裹。折腰損真性。

予連日奔走吏事蚤出暮還君然兄數賜臨問不果一見辱遺佳句謹依韻和酬

朝出雞聲新。暮歸馬蹄茶。思君不得往。一飯或三輟。自從伐木興。友道寢欲滅。夫子眷獨勤。聊解子心結。

橫溪回道中作

赤雲敝層霄。早日作炎酷。解帶蔭廣廈。膚汗發如沐。世無廣寒宮。何地避蒸溽。嗟嗟尙未已。里胥報甚速。云有邑頑民。飲酒盜鼠腹。半酣張空拳。中者致殞踣。甲令著定憲。繼踵當視覆。驅車不敢移。畏走山曲。

敵蓋無丈陰。託庇何局促。因思古賢宰。民鮮犯鞭扑。子賤弗下堂。政務自清肅。顧予今何人。爲治乃不淑。民旣冒重辟。己亦苦匍匐。胡不樹善治。泰然處華屋。

祠僊姑回馬上作

至和歲甲午。德音絕常軌。寬徭且有罪。外復講羣祀。君言一朝發。人神共悅喜。今我官浦陽。距邑越十里。聞有僊姑祠。獨弗識何氏。按圖得本原。云是黃帝女。當年追僊遊。茲地條輕舉。于今數千載。廟貌尙留此。幾欲私謁款。吏事日勞止。遽會郡符降。奉行德音旨。以廟隸邑境。俾我卽祠所。詰朝叩庭下。牲體已夙庀。巋然重林間。檀栢極華美。姑一婦人焉。血食反無已。丹朱雖男兒。而又作堯子。生失四海位。沒同若敖鬼。丈夫不自立。始信徒爲爾。

久雨

雨師握天令。汲汲不停駕。疾驅鞭羣龍。俛首隨叱咤。乘怒作霧霈。不復息晝夜。羲和久埋輪。縮手喜閒暇。山川盛奔溢。若虞歷陽化。農民驗甲子。其應早在夏。農民謂甲子日我疑上天漏。誰能補天罅。慰此農民心。無使憂早稼。

寄辟疆

憶昨枉君軒。始來就客邸。爾僕方息肩。顧我遽屈體。守關前通名。倒屣出致禮。相見吐論議。所學愈根柢。徐爲出巨編。徹若涉清濟。昏膜得篋刮。塵心逾易洗。我亦露狂簡。君曾不訶詆。于時園正花。長日甕盛醴。

插枝必滿頭。飲醴須露底。未幾踏歸鏡。相將灑別涕。戀戀有情照。數數辱書抵。自言困道途。僅能足鹽米。頻吟口燥吻。久騎肉消髀。首飛詩人蓬。腸苦孟郊薺。學舍勉棲託。亨會復傾篋。黃卷樂往聖。青襟列諸弟。愛子乏先容。何人堪密啓。努力著要策。隨詔獻文陛。

伯夷詩

昔紂爲不道。毒心無生靈。四海如在鼎。誰能救將烹。周武從天人。戎衣舉仁兵。伯夷獨何爲。乃諫不聽行。紂徒久厭主。一朝倒戈迎。天下旣宗周。大册書武成。夷義愈爲恥。寧死弗苟生。周粟惡不食。雙目且餓瞑。紂無王者實。徒有王者名。雖曰臣伐君。紂德匹夫輕。吁夷豈不知。意在銷姦萌。

書感

擇己要有持。擇人要有別。淺夫脫所守。柔顏附炎熱。庸兒昧所擇。目前事苟悅。彼柔有時變。爾炎有時歇。歇者旣死灰。變者遂剛鐵。平時綢繆地。一朝等楚越。古人論淡交。君子保常節。作詩貽知言。不爲昧者說。

奉和純甫秋扇

粲粲機中練。作扇圓中規。盛夏天無風。廣宇猶蒸炊。汗流旣浹體。蚊齒仍毒肥。團扇當爾日。功利兩得施。一入君掌握。汗卻蚊攘披。秋風刮地來。涼氣襲空幃。功竟勢亦去。退藏乃其宜。聖人制器用。用舍各有時。弓所以在鳥。鳥盡弓胡爲。蹄所以在兔。兔獲蹄何之。葛屨乃履霜。刺讖見于詩。作扇本禦暑。暑退當棄遺。奚必昧用舍。託怨班婕妤。

八月十六日夜與宗哲純甫翫月

結客城東樓。明月初出海。漸如水精盤。天宮無寸靄。清光如何買。厥價珠百琲。中秋一夕過。已覺人意改。冰輪縱遲遲。此夜復誰待。老蟾益自張。吐輝增十倍。把酒共月語。世態何足罪。自有昭昭輝。千古萬古在。冬日偶書。呈縣學李君擇之。

北風吹嚴雪。草木無媚姿。野田一穗盡。雀鼠猶苦飢。浦陽槩窮山。不與陰冬宜。今我雖旅宦。一身十口隨。有酒奉親壽。呼妻伴兒嬉。幽腸尙多感。悵結對此時。念子客千里。形影外更誰。空齋抱吟膝。敝案覆飲卮。我本依賴少。校子反有餘。何日富貴塗。引子並足馳。朝得位夔契。暮致君軒羲。收身結嘉客。量金買妖姬。人間有閒愁。安能到雙眉。

送純甫仙尉

秋晚送歸客。別酒風前酣。一揖不回顧。瞥然就征驂。挽裾問客故。捨我何其甘。客言有慈母。三歲淮之南。今將拜嘉慶。歸心劇風帆。薄親厚他人。倒置理豈堪。顧予失所問。汗顏爲客慙。客生貴豪家。妙年穿青衫。初仕已絕足。不與羣鷺參。掾邑尙牽制。逸驥受轡銜。縱之使自馳。萬里日可貪。持此作親壽。行矣毋少淹。將別純甫。四十字奉呈。

我馬將北馳。子車亦南挽。車馬無留行。相去卽相遠。風林秋聲乾。落日孤峯晚。後會未可知。莫使別觴淺。將有東陽之行。宗哲爲具話別。以詩見招。因答來貺。

秋高山城幽。風動林葉吼。百感從中來。將分故人手。故人惜輕別。樽酒欲相厚。未飲已頽然。別恨濃於酒。

別筠陽

憶初來筠陽。風土習未穩。家人畏山氣。一日或數飯。愁來數去期。三載若天遠。居之既累月。吏人頗云簡。山水慣可觀。雞彘肥堪饌。却愁解印紱。奪此養疎懶。觴詠趣滋適。不覺滿銓限。門前迎新官。槌鼓鬧田阪。願予謝鄧侯。寧有邑人挽。水聲與山光。念此違耳眼。

寄純甫

相從浦陽官。三十月盈缺。出必並轡游。居常對案啜。予褊子能恕。子短予還訐。久而見交心。中不容間舌。間諜乃於窮秋時。忽作遠道別。別腸如亂絲。一寸知幾結。別語如悲笳。一聲凡數咽。咽極繼以號。旁顧亦慘切。匹馬獨歸來。山城雨初歇。

依韻答貫中見貽

魚蝦泳大海。龍困汙池埋。鸞鳳氣塞吭。百鳥鳴其嗜。猶吾呂夫子。短褐包壯懷。舉腳踏青雲。失勢寸步乖。却視後來輩。厭已猶積柴。否屯豈我獨。升泰奚人皆。一別春四歸。聚首邈不諧。前日忽踵門。謁與行李偕。相迎把交臂。似合已擘釵。于時節清明。花淨無纖霾。共引不算觴。傾瀉猶長淮。歌詩互挑戰。舒慘出百骸。愁吟慘春暉。樂詠舒寒菱。男兒萬里心。無作伏櫪駟。天王下科詔。羅俊基泰階。盍行取好官。一爲光同儕。

野園移植小松

平生歲寒心。頗好歲寒色。一松如人長。慘淡窮山側。樵兒日過之。有意斧斤得。予心異爾意。野圃爲移植。醉聽疎聲眠。吟到細陰息。落落巖澗姿。相對永朝夕。如言千載後。其長可千尺。人生雖百年。相期渺無極。且結無情游。汝固予何易。豈待百年外。人松兩殊迹。人爲松下土。松化土上石。我生始踰壯。足以伴寒碧。公立煎茶之絕品。以待諸友。退皆作詩。因附衆篇之末。

造化于草木。所與有薄厚。茶生天地間。建溪獨爲首。南土衆富兒。一餅千金售。公立南須官。好去聲居衆富右。俸錢未到門。已入園夫手。買藏惟恐遲。祕之逾瓊玖。前日發箱篋。出以奉賓友。蒼玉碾底碎。浮雲盃面走。一飲睡魔竄。空腸作雷吼。茶品衆所知。茶德予能剖。烹須清冷泉。性若不容垢。味回始有甘。若言驗終久。吁茶特不幸。而出三代後。不及餘草木。盡掛詩人口。禹貢籍九州。瑣細登橘柚。古若有此茶。商紂不酤酒。

范鉞進士遺樓徹司馬庭石以質交樓作詩美之邀某同作。

樓君仕塗傑。范子儒林選。論交二人者。誠至不以勉。范也車將西。樓也酒以餞。胡然膠漆地。猶假外物顯。范子庭前石。千年立蒼蘚。移入樓君圃。重可載十輦。堅以示固交。此意豈云淺。怪不涉剜刻。險不至崖巘。坦然久要情。無向石間辯。其堅竟有泐。其重尙可轉。不若照以心。兩確乃吾善。永結忘形游。嵌巖君勿羨。和施耕進士憶竹。

夫子臥古屋。趣敵巖谷深。六籍環一身。口誦頭不簪。瘦碧久去眼。寂寞清風心。朝思蔭之醉。暮思繞以吟。

秋空碧新弄。無處停幽禽。安得青玉枝。來作半畝陰。終朝對几榻。歲寒結知音。於焉傲富貴。追蹤晉賢林。

京華對雪

嘉祐歲庚子。長安一尺雪。落地還成冰。后土凍欲裂。出門望天街。層城裏銀闕。健馬載高冠。傍人指夔高。拜表瑤墀歸。酒面風前熱。萬井莫回頭。窮閭正騷屑。曉突無青煙。饑唇闕彊舌。咄嗟路邊子。未死衣百結。亦有待次人。空囊磨歲月。愁吟徒爾爲。泱泱天地闊。

與任道及順久二師賦小閣見月

醉領玉川子。夜入支公院。危閣邀共登。身在霜空半。缺月穿雲來。塵區未應見。長飄蕩寸靄。天宇痕無線。坐久吹青燈。寒光可對面。飄飄釋苑秀。洒落儒林彥。相逢愛清景。險語寫幽玩。野令才素慳。斗爲吟毫健。詩成萬象索。孤影轉樓殿。遊屢絕出門。高僧應作伴。

誠言

君子言欲艱。出口終身俱。衆人易由言。朝出暮已渝。言之于一身。譬若戶藉樞。爾樞苟不慎。彼戶將誰扶。不重一語言。是輕六尺軀。志言要有成。不成陷半塗。恥言在克悛。不悛行卒汙。今吾觀衆人。一言異朝晡。爾志既可見。爾恥復若無。行將小人歸。嗚呼爾非夫。

祠部集卷二

五言古詩

賀陳右司生辰

悠悠大塊間。萬類分相敵。偉哉拔俗人。真宰豈無力。六羅陷邪說。釋儒共一律。天未喪斯文。公生抱絕識。著書經古今。射策開曾臆。前輩幾欲盡。後來昧所適。天將激頽波。公生秉孤直。數諫難居中。三已無慍色。海宇屬無虞。天工或曠職。天保佑皇帝。公生蘊奇德。培擁棟梁委。一旦壯王國。禁網雖小寬。疲俗未全逸。惟天念我民。公生富才術。發揚雲雨勢。諸方待膏澤。天既責公深。眉壽夫何惜。行看佩相印。不羨登仙籍。南山雅望重。北斗威聲赫。稟生固難朽。吐納自不息。惟昔軒冕徒。尤喜山林跡。留侯追赤松。志就亦何益。傳說爲列星。但已脫寰域。孰如我公貴。與國長無極。

送張升甫三十韻

歲餘容秦雍。處俗失大方。眼前紛朋游。外同異中腸。最得張子晚。一見合柔剛。拜我十年兄。本非以其長。直緣父兄舊。及此三紀強。子之先大夫。疇昔倅餘杭。子時以童子。進謁升公堂。仲兄齒予亞。同學隸州庠。行聯坐接席。無異彼雁行。此時君尙孩。縱記今亦忘。去住忽南北。中間異行藏。後予與君兄。鄉貢入帝鄉。見面初驚疑。偕問徐乃詳。同年忝進士。茲復同省郎。伊予論契好。始見今髮蒼。昨君解下邳。東去隨薦章。

歸來婦翁家。春風到秋霜。予居幸對舍。有酒呼隔牆。往還興頗熟。間外絕毫芒。乘月步橫橋。觀漁立回塘。詩句迭唱酬。稍稍積巾箱。自許先功名。知我尙激昂。放言遺形骸。不以我爲狂。古稱管鮑交。千載竊相望。辭我復云東。坐不安吾牀。汴水日向落。更久不可航。甬東拋田園。不治久欲荒。急省江南兄。數事皆不遑。慙慙挽征袖。強留盡一觴。何以將別意。時菊有清香。

送吳令常甫之武平

朝廷重一邑。悼昔容備員。自嚴薦舉法。頗號近得賢。仕者旣擇地。主恩那罄宣。遐封暨惡壤。十必九棄捐。武平杳何所。閩裔天南偏。林密毒虺藏。吐瘴蟠長烟。冬候氣亦暖。里俗衣不綿。舊令昨請代。闕榜張三銓。無人議一往。常甫獨不然。丈夫志四海。豈安廬室邊。畏避屬衰怯。我今幸壯年。所寄有民社。勇去無山川。吳天破新臘。雪片衝離筵。闔坐勸別盃。情厚禱亦虔。藥餌慎勿疎。善保食與眠。旄牙起驚濤。錢車散江壖。吏民前塗奔。爭迎上瀧船。到修府中謁。首低小侯前。主人知才名。應以塵土憐。下車轉春首。訟未臨婚田。遠人喜新君。有訢恐不先。據案掃滯務。一決如流泉。呼兒伴兒戲。邑事樂靜便。地寬人物稀。林實雜海鮮。荔子委樹旁。毛魚不論錢。飲食信云美。那肯事宴筵。政休寧閒齋。空腸味陳編。他人保無過。歲滿猶目遷。矧君資性好。進業補未全。材長老松幹。氣強直弩弦。坐養青雲資。歸著要路鞭。君家新蔡後。清節能世傳。豈必因賞格。薦狀期聯翩。鄙人忝末契。相識由童顛。憂懷自足感。況復別緒纏。君其慰我私。北鴻附新篇。

曾元恕累日不相見以詩垂寄依韻和答

丈夫收功名。要在少壯時。今予四十強。才短良時遺。俛首入掾曹。所託真一枝。動靜繫他人。何異馬受廐。事業乖聖賢。飢寒愧妻兒。浩歌望青雲。致身分已遲。江湖久去眼。終日懷釣絲。元恕知我深。愛惡非衆隨。憐我事冗宦。役役猶兒嬉。十日不一見。敢以奔走辭。與子結永好。交情保無移。相從文酒歡。晚歲滄洲期。走筆成一篇。答徐君先輩見寄。

定交初何年。昔齒會稽學。君壯我尚少。道復先我覺。子時于衆人。百鳥一鷲鷲。學官程諸生。題品或義卓。衆方縮手顧。君筆已一捉。落紙千餘言。渾如玉出璞。詞場或鼓行。無敢犯鋒稍。有時談遺經。聖賢在口角。憤疾異說妄。摘抉三傳駮。語氣清不休。旱天冽雷雹。南北俄乖張。同時去師幄。未幾會京國。君羽正濯濯。以文試有司。好古拙雕琢。一失太常第。聞子繼屯剝。翠鐵累在毛。龜剔覺由殼。古人亦憂患。千載名愈倬。予雖綴小官。夙志負山嶽。簿領但戕性。祿粟不周啄。再命作陋邑。舉動尤齷齪。旅巢子何所。距我幸非邈。寄詩冬爲期。當遂笑一握。待將得喪理。同付尊酒濁。

送元恕

我本生窮閭。才命兩乖塞。再試得一第。失足落銓格。去年赴選集。摩肩雜隸役。吏口駢名呼。摧沮氣填臆。僦居在間坊。門巷罕人迹。于時苦病吟。誰肯顧越鳥。高冠縱一臨。車馬有屈色。平生青雲志。帖帖若墮翼。羨君富詞才。時志復兩得。解褐拜初命。便綴審官籍。秋高馬足健。駕言往京國。諸父列禁嚴。南北羅第宅。往來伯叔間。此行穩棲息。君家世儒林。圖史況山積。燈火今可親。幽探勉餘力。京都號紛華。君志定非溺。

勿貽雙親念。此外慎眠食。

早行灑池道中

二年別咸秦。八月過嶠灑。碎石隱地起。險塗抱山轉。我馬無完蹄。我僕有重趼。林紅烈炬暴。澗白亂流淺。夙駕露濕衣。夕休獨臨饌。轍迹環九州。孔子未能免。咨予獨何人。安坐顏輒覲。區區適其宜。誓將策疲軟。乙巳十月七日過黃河中流。遇巨浪偶作。

清且絕大河。拍隄衰黃沙。巨舟忽搖簸。心悸眼亦花。咨予豈輕生。將身試魚蝦。忠信固所憑。此理懼或差。定息神魂寧。歸心眇天涯。故鄉念昔游。湖面帖碧紗。醉舫穿菱荷。坦腹如眠家。天水自照映。鷗鷺相交加。雖無風波憂。齷齪未足誇。豈如尋河源。安穩浮靈槎。脫略遺近觀。飄飄薄飛霞。低頭顧濁流。卑險吾汝嗟。過潼關

巨方信天開。嶓嶓土山口。豈惟控內外。勢不漏飛走。一夫或當關。可敵萬夫守。山河此襟帶。怙險聖所否。明皇晚倦勤。意恃太平久。絕艷荒眞妃。轉盼六宮醜。祿山假天性。恩象不知厚。鐵騎長驅來。哥舒苦徒手。吾君暢道德。四海一父母。人心自固結。茲關復何有。

苦雨

關軸連歲旱。耕地千里赤。官家放租稅。猶有道邊瘠。羣國乞膏雨。童巫叫蜥蜴。神聽久寂莫。民意轉淒惻。天公忽瞑目。一怒乖龍殛。雨師偃其旁。驚起振厥職。不復計多寡。傾瀉信朝夕。入地知幾掣。以掣測

地上但盈尺。澗如三峽注。那辨四簷滴。落勢曾未停。廬井反憂溺。始知天公難。不易人願適。舉頭告風伯。速吹濕雲垢。却還秋日光。迤邐照阡陌。俾民布新種。來歲飽麩麥。

幕中偶書

劉侯驅車東。幕府賓客稀。凭几獨蕭然。真與萬事違。巢燕無世情。閒堂時一歸。東風忽怒號。輒來撼窗扉。攪我靜中趣。聒聒無停威。塵沙亦侵人。猶喜勢力微。日暮風稍息。出戶聊振衣。行吟視庭木。枝空但花飛。幽思感晚春。浩歌送斜暉。翟公大書門。怨激恐已非。俗物喜去眼。杜子吾庶幾。

徙居

人生如寄客。況復真客宦。南舟與北車。來往若征雁。殘暑赴西雍。冉冉忽秋晏。三徙乃定居。始至寓法操廳。又徙伴廳。又徙書記。遂安居。什物旋營辦。騰移費負挈。猶恐僕夫訕。幕府文書稀。食息有餘間。短才之所補。公給浪蒙象。懼辜主人恩。從事不敢慢。南軒有佳趣。流渠瀉幽澗。潺潺無時休。弄水悅童卯。關中氣候晚。時菊始云綻。亦有終南雲。朝暮生顧盼。浩歌一樽酒。常分任鵬鷄。

幕中書懷

宦游老歲月。春花漸空枝。坐耗鏡中顏。日饒鬢邊絲。流俗宜重輕。青雲勢參差。剛腸寡所合。出門復何之。趣向於今乖。考古聊自怡。黃卷有聖賢。目覽心與期。君子願萬世。小人較一時。不見九原骨。貴賤共狐狸。惟有賢愚名。縱久亦兩岐。退之賦二鳥。無乃爲物移。信已一推天。孟子真吾師。得喪付濁醪。身外非所知。

九日與諸君飲

寒暑當遞遷。日月會陽九。綠鬢驚秋風。黃花泛樽酒。行樂重此辰。登高命諸友。古人感塵世。宜開笑歌口。送梓中赴舉

朔風攪疎林。短日寒無暉。有客氣軒昂。束書赴禮闈。行囊雖云輕。滿抱藏珠璣。出以售春官。善價其可希。骨肉送出門。稚子猶牽衣。我爲舉別觴。一言庶不違。京師足紛華。慎勿事輕肥。白首有雙親。待子得官歸。石亢之出銅雀臺。硯相示信筆題其後。

銅雀遺荒基。寂寞千載下。黃埃朽壤間。所得或片瓦。硯材世共珍。購金不論把。浪好昧所別。往往亂真假。聞毀

憶初向關中。觸熱事西走。淋漓汗征衣。早夜犯星斗。驢然赴所知。辛苦復何有。主人喜賓至。相見勞杯酒。誓將効毫髮。聊以塞所厚。遇事因輒言。何嘗計從否。平生性坦率。間或忤交友。是非長安城。側身避讒口。彼姦乖其前。吾慮亦已後。二叔誣周公。三人感曾母。青蠅亂黑白。視潔以爲垢。聖賢且不免。予免焉能苟。浩歌動歸歎。至此信不偶。春風憶東南。巖花映溪柳。南山有屋廬。釀熟喚鄰叟。何時理扁舟。舊物入吾手。回頭謝信信。投北汝誰受。

壬子歲旱

熙寧歲壬子。春旱初可怪。不雨訖夏尾。天地一爐鞴。赤日裂厚土。黃埃沒經界。農夫望雲霓。脰折意未懈。

侍中守北門。撫俗先罷瘵。閔雨憂更深。徧禱劇齋戒。老宮與佛廟。三日一往拜。冠者勞於呪。褐者勞於唄。雨應寂不聞。煩鬱何由快。憑誰訴天公。請執乖龍械。

予初春被病。中夏少間。勉入省局。偶成二十二韻。

東風吹春來。移病聊少休。寒熱戰予軀。漸如錯春秋。侵尋日以劇。謁告牒屢投。性命吾自安。所負空食羞。交親每問訊。愛者或見憂。伏枕數晦朔。忽忽月四周。有叟肆囁嚅。咄哉我何尤。騰口狀予疾。張大實頗浮。背憎說休咎。唯恐予疾瘳。寧獨冀術勝。仍欲悅予仇。叟乎汝何愚。天命非爾謀。生死籍素定。理莫移恩讎。身世如寄客。日月速置郵。引照盍自徹。霜雪滿汝頭。胡然不知止。脅肩諂貴游。十進苟朝暮。利吻銛戈矛。予今偶不死。官意滋悠悠。卻來坐省局。心跡逾林邱。北扉對新篁。陰薄榦已修。薰風送瀟洒。不博千戶侯。富貴功名間。有待終無求。鸞鳳志寥廓。燕雀徒啾啾。

某蒙君章見寵。示櫻桃佳篇。輒依韻奉和。

炎蒸有正色。下與地氣關。相結成含桃。使冠百果班。獨憂赤日曝。坐變紅成殷。多應絳闕種。上流落來塵寰。金盤瀉不定。四走如循環。睡龍失火齊。頷空皆血潛。以口比樊素。白傳誇嬌鬢。卻嗟荔子陋。遠在炎荒山。每歲貢天子。險路勞緣坂。豈如盛京洛。地廣生不慳。朝須暮可進。先御後匪頒。離樹旣不久。弗改猶童顏。吁嗟唐中宗。游樂芳林閑。芳林園名君臣失儀度。口摘省手攀。不聞薦先廟。書在史冊間。愈籍爭詩豪。勁句

嘗往還。予知青冥賜。難到山溪灣。韓退之和張水部敕賜櫻桃詩有傳賜出青冥之句林園幸自有。圓顙赫不顯。雖熱豈厭食。縱密寧忍刪。況此鮮嫩質。非並青梅頭。

羣牧司雨中池上作

累朝困炎威。一雨轉愁意。偶看碧蘆叢。宛在滄洲地。岸草閑自滋。庭葉紛以墜。移牀就幽窗。簷溜聒清睡。送章傳道東歸三十八韻

一日或數篇。數日哦一軸。夫子之於詩。夜補晝不足。長吟天地間。萬象困題目。天徒飽其才。而特餒其腹。聲名三十載。半百事場屋。年年試春官。淡榜輒不錄。東風吹殘花。客淚迸京轂。回頭謝青雲。卻抱來時玉。河陽謁相公。每見輟飯沐。贖金實空囊。禮遇駭僮僕。遂游西諸侯。騎馬度函谷。長安尋素交。零落半邱木。惟有終南山。相看似舊綠。東李雅好客。既親意轉篤。授館如投家。晨杯繼宵燭。羸馬殘青芻。餞僮厭餘肉。予方坐幕府。陷嫉苦流俗。羣吠耳且盈。介立趣頗獨。得君倍歡然。坦不置邊幅。論情雖云晚。聞誼固已夙。二章初交鋒。懦氣令避縮。自笑不量力。強和旋取訕。從此遺形骸。留饌或脫粟。有酒時招邀。共醉小軒竹。議論到聖賢。道德富停蓄。豈比篇章流。烟雲繞心曲。飄飄走邊城。新禁察儒服。戎帥不敢延。進退勢俱觸。六月汗霑衣。幾作窮途哭。回來臥旅舍。所得不充欲。鄉思生秋蛩。輕裝遽云促。行當買淮田。晚歲謀退築。子材覺無庸。計慮亦既熟。無姿媚要權。與世背馳逐。祗台從漁樵。胡爲苟寸祿。淮吳幸相望。有鄰可容卜。浩歌老吾生。爭食任雞鶩。薄宦猶糜人。歸飛羨黃鵠。

竊祿了無補。臥疴慙有日。空聽朝雞鳴。咀挂朝衣出。啓處不自安。灼艾加諸膝。庶幾起沈疴。犬馬委微質。立秋後病作此寫懷。

臥病喜秋至。昏煩庶以平。清風不少濟。宿疾仍相嬰。涼葉猶未振。陰蛩已先鳴。四時順萬物。奚獨戕吾生。入山謁怡然上人。因成短篇。皆書即時事。

行穿六松陰。鳥語逢人寂。林僧洗山鉢。正了寒堂食。揖我喜滿顏。吟窗半軒闢。鳳凰山不無情。天外送佳色。春風動花雨。枝上或涓滴。羨師得安住。我亦有閒適。出門懶鞍馬。把袂步幽石。石盡浮泥深。恰恰露雙屐。臨別心徘徊。野店更一息。

僧副普濟過予。詰其師名僧職之所自。則曰嘗活飢民百萬。朝廷論酬以得之。欽嘆不足。繼以詩云。佛子葦麻衆。槩能蠶食人。庸奴買師名。納貲不計緡。普濟釋苑秀。類同行佛均。往歲東陽饑。愁聲聒蒼旻。天民坐欲死。誰肯發一困。師勇營饘糜。全活百萬民。外臺上其事。朝廷嘉師仁。相府議優賞。美號寵厥身。汝往貳爾正。示勸出聖神。今時士大夫。體雖具纓紳。十九飽妻孥。何暇及困貧。視師固有激。抑可警其倫。

墨蟹

瑣瑣江湖中。忽在幽人壁。短螯利雙鉞。長跪生六戟。骨眼驚自然。熟視審精墨。初疑蠶穴束。猶帶浮泥黑。橫行竟何從。躁心固已息。終朝牆壁間。頗有肥霜色。我來空持杯。左手莫汝食。誰奪造化功。生成歸筆力。

祠部集卷三

七言古詩

棲雲閣

越山東南號勝絕。古寺巖洞窮高深。山雲出爲洞口雨。或時散作巖下陰。不有神物此蟠據。安得氣類長相尋。寺僧愛雲恐雲遠。置閣雲上躡以臨。豈惟憂懷獨舒悅。更許遊客開塵襟。客來祇知寓暫賞。不道歸去還塵侵。寧如僧住得安穩。終日自共雲無心。

陸君置酒爲予唱陽關卽席有作

陽關何處草烟平。不識陽關空記名。古人驅車欲西過。吟成善寫離羣情。天涯此去故人絕。雖有樽酒同誰傾。古人幽怨幾時盡。至今愁殺陽關聲。陸君酒酣喜自唱。坐上客淚俄縱橫。杯盤咫尺意萬里。忽若身在關山行。耳傍宛聞車馬動。簾外已覺邊風生。乃知酒樽須故舊。爲君一飲無餘觥。

結交行

貴友高車照簪組。富友黃金輕糞土。二友方論富貴交。以漆傾膠入心腑。一朝金盡囊無餘。門前不見簪組車。貴人今車底似昔。早失黃金舊時客。由來結交要勢均。一輕一重難爲人。滔滔世上耳餘輩。寂寥管鮑今埃壁。交情以勢不以義。今日雖同明日異。君子結交自有持。賤貧富貴不我移。

依韻和李評文思

我心烟烟君應識。萬事都慵獨吟癖。二年客眼看京華。可見無媒進無益。勢門所喜在佞豪。直語空拳無一憚。愛君挺拔生貴家。不學庸兒醉朱碧。兩提試筆賦翰林。落落金聲天上擲。改丞殿省頭不回。直把羣經重研摭。相逢憐我猶滯滯。四十金閨未通籍。勢門宜不容此身。賴有君家好投跡。書齋延坐開新編。光燄文章追祖白。更邀詩社同襟期。脫略形骸一疏戚。公侯必復君勿遲。志士由來輕尺璧。

贈賈麟

賈君貌古文章老。虬髯鋪胸犀插腦。戲誇才力驚衆人。談笑千篇筆端掃。酒酣座上披天真。剗去崖岸露懷抱。今年禮部更新書。續詔九州登俊造。宿儒晚秀趨術忙。肝愁胃苦搜辭藻。獨君所向異爾爲。長袖披陀踏幽草。君近遊徑出行窮兩徑躋巖巔。指點晴江辨秋島。却騎匹馬歸湖山。古寺相逢情愈好。空樽無物醉故人。輒出囊錢具梨棗。更長坐久然青燈。語雜譏諧欲顛倒。我方正色起問君。何乃終年事枯槁。齒牙未豁才有餘。一賦從容成腹藁。琢磨高論馳古今。足歷天衢聘王道。鴛羣杳杳猶爭先。驥驟胡然甘伏阜。君徒俛首不我答。我反慙顏汗如澡。丈夫貴富難近窺。一第定非論晚早。豈同祖誼名漢朝。位不公卿身已夭。何時却掛吳淞帆。霜蟹初肥恰新稻。

前日以詩贈賈麟進士。繼蒙和答。而楊蟠從事亦次元韻。鄙思不休。輒復自和二篇。

賈生俊辯凌諸老。二十漢廷冠插腦。魁奇遠裔空傳家。慘淡壯年翻却掃。巧心用過金幾緡。憤淚頃乾玉

三抱五湖夢數歸。何時四海形單生。不造鄉宴無心聽。鹿鳴時平有口歌。魚藻每舒意氣拂。劍光懶把窮
通叩蒼草。江河飲肺吞阮劉。風月吟腸笑郊島。君才慎勿恃晚成。俗態由來尊少好。衆人競進皆握苗。獨
子甘貧猶嗜棗。囊裝未抵一羽輕。筆力堪支泰山倒。閒身自放壠上耕。愁面誰憐澤邊稿。幽尋騎馬衫覆
羈。冷臥乏氈牀露藁。無勞兒女憫滯材。豈竟乾坤厄吾道。從前平步封公侯。亦有逢辰出輿阜。光華聖旦
髮可晞。涵泳儒流身已澡。收還事業幸未遲。揖取功名須及早。不然一世成虛生。雖曰百年實如天。公朝
富貴弗汝慳。仕路高車似麻稻。

其二

愛君氣幹霜松老。一見相投許肝腦。豈同世上秋葉交。不及歲寒如電掃。有才無命三十強。寂寞吟齋膝
長抱。愁來徧踏公卿門。綻褐不縫誰改造。文章直吐元化胚。天樸豈須施斧藻。長篇下筆縱立成。一字未
曾傷草草。辭源奔注吞衆人。有似驚潮沒孤島。善君取友論片能。不學常情求百好。琢磨六藝相與游。我
媿性靈昏樵棗。平湖綠淨時招邀。爛漫清尊爲君倒。客塗見月凡幾圓。勸馬聲飢奴色槁。路傍甲第欺儒
冠。奴厭腥肥馬餘藁。我疑造物偏膏粱。富貴何緣慳有道。貫糜巨室君空囊。朱紫摩肩君衣阜。大鵬寧合
安尋常。怒翼天池終刷澡。功名豈必收目前。兩鬢未銀猶得早。顏彭骨朽千萬年。漫與後人論壽夭。君其
努力攀青雲。盛醉春風釀香稻。

題惟晤師斑竹杖

蜀江濯錦含文漪。竹生江岸初綠滋。錦波一浸入竹肌。萬洗不落斑在皮。又聞淚點灑舜妃。遺跡漸染傳今時。搯不受爪滑可持。隱起高節無屈鼓。江神雖寶莫自私。煙根忽逐霜刀離。截而爲杖得者誰。龐眉大士今一枝。爛爛頗與壞衲宜。朝躋山巔暮江湄。山備兕虎江蛟螭。爾杖未折莫汝危。足力自健無險巇。安用童子兩肩爲。當年常竹紋無奇。猶託變化神葛陂。况此已是斑龍兒。長恐一旦風雲隨。復整頭角還天達。未必久爲師有之。

和禮之喜雪十二韻

水官司冬不舉職。天地當凜氣輒溫。頑風伺隙倒天令。掃蕩不使繁雲屯。陰崖邃谷殆窮臘。空有雪意乘朝昏。宿麥老枿亦借便。欲洩陽氣芽株根。往往百怪竊窺視。思以沴疫傷羣元。賴吾太守爲民切。百拜默與上帝言。臣因視民間農計。亟雪猶可望有年。知民所欲弗帝告。安用備位稱守藩。至誠一發動天聽。霄垠地堦俄瓊璠。混然上下共一色。直疑元氣猶胚渾。狂風埋藏反失勢。卻授威柄還水官。旣云豐年在冬雪。豫擬癡腹盈朝餐。

送關景芬祕書赴山陽尉

峨冠初上童兒首。君已老成予輒友。肺肝相照二十年。今日不殊前日厚。紛紛共笑薄媚徒。對面論心回面否。吁君意氣非昔麤。猶著青衫從吏部。得官將尉古山陽。有蘊無施州縣後。山陽楚邑爲最雄。聒聒衆喙千萬口。階庭聽命趨上官。守閣使臺轉日走。舟車冗客來百須。政遂從違成好醜。君才遇事有卷舒。公

遣當官膽如斗。或時畏縮類懦夫。私請不容毫髮受。往行素守裨長官。肯到縣廳同木偶。頗聞彼俗殊東南。例重市門輕隴畝。鹽商茗販白刃隨。切與椎埋破淵藪。能聲自可博己知。懶趁庸兒媒左右。吳江日暮山川愁。踈樹烟頭排敵帚。北帆欲掛傾別觴。還有陰風吹散酒。醒難爲別醉幾何。人世無時好分手。知君此去忘故園。淮月楚雲惟我有。

送吳判官

兩乾青活淮上山。君領善課趨帝關。春風滿路馬足健。翩然征轡不可攀。吁君登科越一紀。中又困躓罹苦艱。蒼虬垂髯猛虎臥。青衫四十鬢欲斑。我疑君胸典籍府。千軸萬卷羅其間。聖經賢史及怪說。叩之不已如循環。有時啓口論時病。往往憤發涕欲潛。位卑道屈志未就。姑以大筆誅雄姦。就令君居太史局。猶足上下馬與班。剛然古膽貫白日。不爲權貴柔正顏。退之嘗患天地惠。偏向君子懷獨慳。高冠大笏盡知已。行矣得意東南還。

贈徐君強

浦陽窮僻山縈迴。徐子匹馬窮山來。十年不見安否外。怪子面黝身紅埃。自言壯圖醉無幾。獨有古膽剛不摧。日子篇章遺孤憤。袖出巨軸爲我開。密行細書幾千字。一一紙上皆瓊瑰。渾然天成有警句。直若未剖元氣胚。閒工磨琢弄纖巧。真宰手把天葩裁。詩人古亦少達者。非特徐子如寒灰。孟郊老獨張籍瞽。李杜落魄皆何哉。剔抉幽祕奪造化。雖甚寒餓天弗哀。又疑才命不俱得。既奪之命止與才。子今所往但逢

蹇絆驥兩足猶驚駘。浦陽山深尙春淺。桃李纔榮花正梅。子時過我值訟簡。花下一飲將百杯。酒酣慷慨起勸子。更厲頭角需風雷。縱令不偶竟窮死。猶愈空腹冠崔嵬。

邑舍東池。近日荷花盛開。輒書短篇奉邀宗哲、純甫、二同僚。

前時乘暇到池上。荷花未開荷葉小。彌旬風雨隔追賞。期會簿領復煩擾。今朝始得臨舊隄。花開已繁葉將老。古人最謂行樂急。癡兒漫欲官事了。錢楊與我近同趣。一樽今待共君倒。聯鑣且來趁花飲。莫待紅稀并綠稿。

七夕

七月七日暑氣徂。此夕何夕樂且娛。世傳牽牛會織女。雨洗雲路迎霞車。初因烏鵲致語錯。經歲一會成闊疎。牛女怒鵲置諸罪。拔毛髡腦如鉗奴。星精會合不可詰。我疑此說終誕虛。又言星能遣人巧。羅列瓜果當庭除。綵絲貫針望星拜。夜深乞巧勞僮愚。吾聞樸散形器作。人奪天巧天無餘。匠心女手劇淫巧。工與造化分鎔銖。薦紳大夫一巧宦。坐取公相如指呼。間乘巧言惑主聽。能改茶檠成甘腴。纖辭麗曲騁文巧。剗刻聖道無完塗。星如有巧更可乞。益恐薄俗難持扶。我願星精遣人拙。一變風化猶古初。

題蘊忠上人歛硯

山俗有硯名龍尾。此石來從歛溪水。通明直可照髮毛。瑩滑不容安手指。案上長疑片月生。匣中自有浮雲起。蒼然顏色涵秋波。不學端州誇嫩紫。溪匠琢爲寒丸形。如從銅雀初飄零。只仍故狀不復改。獨有亂

點生繁星。高閣上人妙書劄。什襲藏來時一發。拂開輕霧磨煙煤。揮洒霜毫冰紙滑。咄嗟此硯何爲哉。世上別有潤色材。胡不往焉與徘徊。日濡大筆把詔裁。無久滯此空塵埃。

通判國博中齋詩

天下以中爲大本。天地得中能自生。古之聖賢一用中。政刑禮樂萬事平。於戲後世中道喪。政分寬猛刑重輕。禮非儉陋則奢僭。樂不專一須鏘鏗。其間萬事亦頗僻。或過不及誰與繩。今公奮然力追救。大署中字爲齋名。謂中之迹不可見。粲焉其道存六經。尙書洪範有皇極。春秋王道爲權衡。在易之爻貴二五。于詩無邪義甚明。子思著篇究根本。王通命說垂儀刑。夜探羣書味中理。雞鳴而作還奉行。出處語默皆時中。措諸萬事無側傾。有時賓至相與樂。詠歌亦作中和聲。簷前竹樹有中色。四序不改長青青。公今一州貳守政。千里猶變中庸眈。異時朝廷贊天子。擴之四海中道成。某得攝齊升公齋。一聽中論退服膺。

還府推楊學士無爲編

蜀山秀色參天起。子雲文章摩玉壘。關右衣冠從古名。伯起光華擅楊氏。後來氣象幾寂寥。今日西州聞學士。吁。雄述作擬聖人。躋蹬三朝官不徙。震雖有時無雄文。而又晚齡纔得仕。豈知學士丁妙年。一日青雲趨萬里。高才大筆驅古今。奄有震雄兼二美。布衣平昔抱經綸。浩蕩著書窮日晷。幽居獨占無爲山。因以名編仍號子。編學士既以無爲名。復自號無爲子。鑿開元氣爭化工。剔出微情泣山鬼。先儒浮妄遭芟鋤。直與六經相表裏。青衫冗掾錯致身。四十磨肩雜胥史。日趨官府舊學荒。已分清流將絕齒。前時輒辱授此編。如以咸韶

震聳耳。夜侵燈燭。晝廢餐。若涉江河。徐見淡。乃知無爲非不爲。道化自行而已矣。立朝本此足有施。堯舜吾君那出是。天球豈合藏窮家。再拜持編復齋几。

謝通判國博惠建茶

建溪春早地未暖。建俗巧計催春陽。茶傍萬口噪地烈。驚破芽英不得藏。猶嫌旂槍已老硬。獨愛烏嘴嫩未長。擷而焙之一朝就。更範圭璧爲圓方。南州尙珍北固重。自非富貴寧預嘗。浦陽賤官性怯酒。素許茶味爲最良。日分牒訴費齒舌。口吻鎮燥喉無漿。建溪奇品遠莫致。日夕夢想馳閩鄉。塵埃填心渴欲死。忽拜公賜喜可量。拆封碾破蒼玉片。雲脚浮動甌生光。愚知公賜豈徒爾。欲俾下吏蠲俗腸。滌除詩冗起清思。驅逐睡興窮縑緗。玉川不暇盡七椀。已覺兩腋清風翔。

予家畜狸花二貓。一日狸者獲鼠未食。而花者竊之以去。家人不知。以爲鼠自花獲也。因感而作二貓詩。

狸貓得鼠活未食。戲局之地或前後。貓欺鼠困縱不遂。豈防厥類怠其守。花貓狡計伺狸怠。帖耳偷銜背之走。家人莫究狸所得。只見花銜鼠在口。予因竊覘見本末。卻笑家人反能否。主人養貓不知用。謬薄狸能服花厚。花雖利鼠乃欺主。竊狸之功亦花醜。人間顛倒常大此。利害于貓復何有。

純甫以予去歲九日赴東陽。今年復趨府。作菊花問答見遺。因以戲答。

問籬菊何事。秋香欠春馥。淵明歲歲走征塗。冷落重陽誰采劘。

原书缺页

原书缺页

鬢不爲雪。安得共子並翼飛。四方上下無時別。

臨洛驛雨中作

朔野無花春意薄。斧聲惟見桑枝落。北人是日競條桑。手執懿筐共操作。客亭繫馬吟寒廳。細雨纏愁牢似縛。多情北燕能傍人。如設春心繞疎箔。故鄉桃李應滿園。爛漫香風隨處著。十年游宦辭江湖。塵土日侵雙鬢惡。天涯懷抱傾東南。悶對青燈舉幽酌。

丙午寒食。厚卿置酒壓沙寺。邀諸君觀梨花。蘇子由不至。以詩來。邀席客同作。予走筆依韻和之。

種梨易長地舊淤。春風一掃無枯株。沙頭古寺枕城角。樓殿自與人迹疎。看花置酒三月破。點檢座客唯欠蘇。酒酣花底不知處。恍若身世游藥珠。銅臺割據古豪盛。樂事已去唯邱墟。直須及時結勝賞。莫局官事同轅駒。林僧迎我屢前揖。野鳥避客遙相呼。咸陽有花遠莫見。豈若此地來須臾。風前嗅雪不宜緩。春芳過眼猶奔車。繁枝向月合照映。亂片落地無掃除。樽邊酩酊不復計。馬上倒載聊拊扶。子由閉戶自懶出。花與雙眼知何辜。天姿必欲貴純白。紅杏可婢桃可奴。君詩險絕不容和。梁園騁思慙相如。

寒食安厚卿具酒饌。邀數君子遊壓沙寺觀梨花。獨蘇子由不至。詩來命座客同賦。予既次韻和之。明日上巳。安復置酒招予與蘇。又明日清明。予屈二君爲射飲之會。而蘇君仍用前韻作詩見及予。亦復和。

花前爛醉如泥淤。猶恐花過嗟空株。壓沙梨開百頃雪。春晚未賞計已疎。厚卿置酒趁寒食。蜂喧蝶鬧人

意蘇林間把盞誰我侑。鳥歌聲滑如溜珠。魏都風流重行樂。豔妝麗服明郊墟。我初聞招便勇往。恨不插翼傳駿駒。峨眉夫子趣獨異。靜坐幕府煩邀呼。車公不到座寂寞。大句落紙來須臾。樽邊弄筆輒強和。布鼓乃敢當雷車。主人明朝復命客。是日禳事修被除。日涵花氣暖不散。酒力易著起要扶。清明予亦飲射圃。罰鱸屢困辭不辜。杯盤一飽藉脫粟。那有白飯餘君奴。事見杜工部集梨花好在期共醉。功名身外終何如。

送用僧玘上人歸雪竇

釋子羣羣蹈一轍。類能恐誘鼓師說。彼上人者劍外來。獨許清吟調風月。就我乞詩歸甬東。三叩賓階通刺謁。何時腰下解餅盃。巖竇應逢先臘雪。

小桃值風零落殆盡偶成鄙句奉呈諸君

小桃庭前祇一株。無數花開豔新繡。破癩脈脈向人笑。鬧枝酣酣索春鬪。只見蜜蜂往來喧。不道雙燕共時候。醉吟繞花日幾遭。坐臥欲來花下就。東風昨夜忽顛狂。曉枝點檢不依舊。惜無錦障闔百步。遮藏免被風力驟。小兒地上拾亂片。猶愛殘香再三嗅。桃兮開落奈汝何。却取餘杯醉春晝。

近承楊子遣垂和池上短篇愛而有贈且攄予懷

楊子文格少已逾。自關以西鮮此流。逸興一發不言休。詩吟千篇酒百甌。始謂富貴力可求。行年四十差厥謀。相逢渭水初清秋。氣俊秋隼辭長蚪。歡然一見分輒投。往來自爾月屢周。忽聞屋角鳴春鳩。感時出門寫我憂。載酒興慶荒池頭。半酣繫馬聊登舟。紛紛涉水驚眠鷗。晚陽欲落孤煙收。開元盛事空林邱。流

年數百如同眸。陳迹隨感來吟搜。偶作短句詒同遊。楊子既見遽和酬。筆落紙上不暫留。詩珍玉案書銀鉤。詩人乃是天地讐。造化萬物遭剗鏝。天公報之甚操矛。少使稱遂多窮愁。子嘗兩舉試此州。病坐試席出則瘳。筆力健可掣十牛。及與命鬪力弗侔。翻被命屈豈自由。嗟予所學淺以浮。不與造化爲怨仇。胡然天公亦我尤。剛腸勁貌寡媚柔。觸忤貴勢在轉喉。蒼顏常調祇自羞。使看平步趨公侯。子來我語徒啾啾。天高聽卑誠繆悠。不若且默真良籌。有酒一醉春風樓。

送李去病楊元老

君王赫怒超前古。威令風馳奮皇武。將士咸懷敵愾心。桓桓孰可當貔虎。岷峨橫抹西南坤。河池散關當北門。堅城高寨礙飛鳥。天兵百萬方雲屯。給軍自古資巴蜀。接軫連檣轉芻粟。正須將漕得其人。賦役平均軍食足。三分才具超常倫。不獨摘藻追淵雲。究宣德意可預見。抉剔姦蠹蘇疲民。使星入蜀今重應。芒寒色正相輝映。川合東西幾萬家。佇瞻玉節交相慶。行閱盡錄平戎功。給餉正與提兵同。紫泥封詔看西去。歸來聯騎朝王宮。

賣松翁

窮山老松幹百尺。縱有愛者勢難植。小松聳擢未及丈。何亦冷落守巖石。由來世眼習繁修。競事妖紅與爛白。往往破產聚名卉。未見有一號松癬。城中有客賣桃李。美價高下隨意得。咄嗟彼叟何爲者。浪負松本窮九陌。行求善價吻欲燥。力弛還立朱門側。過之千百絕一顧。寧復肯許一錢直。音聲猶帶澗風澀。顏

色尙染嵐煙黑。松材雖良人未見。其奈桃李有春色。嗟哉子計信疎矣。豈宜肩入芳菲域。速培舊土養松幹。待棟明堂柱帝宅。予疑叟非鬻松者。無乃矯世所爲特。衆趨時好逞穠豔。何獨子子銜皴碧。羣雄馳騁尙譎詐。軻以仁義游六國。時乎釋老肆分籍。愈以原道破羣惑。叟乎叟乎予爾知。獨行矯世難爲力。

與盛毅同賦暮角行

城頭滾滾寒煙起。城裏無人冷如水。一聲暮角聒地來。聲中宛轉含餘哀。逡巡流入單于調。耳邊似近單于臺。坐客未終聽。對面淚雙迸。那復將軍絕塞眠。朔風吹落玉帳邊。狼烟未盡不待曉。恨不立起銘燕然。何人始製角中曲。幽怨到今傳不足。吁嗟畫角終無情。百年日日銷此聲。

冬雪行

幼年壯氣寒逾熱。更喜朱顏照飛雪。門前地厚堆玉塵。屐齒千回狂走折。今來過壯能幾秋。眼未見雪心先愁。病膚隱粟出門懶。敝袍盡日紅爐頭。此身知更十年後。雪屋能如今坐否。層衾沒領定晝眠。那復吟邊開凍口。壯齡袞袞洪濤奔。百年浩蕩未易論。人間萬事亦顛倒。且對今雪空清樽。

送盛君方

秋風木葉飛邊徼。日暮銅臺別杯醪。燕姬一曲聲未終。交臂方攜忽南掉。相公鎮魏從辟書。玉帳三年奉談笑。密謀直道裨主人。飽食庸兒或陰誚。君殊不顧但自若。爛爛誠心復誰照。相公還朝數論薦。援手無人在廊廟。薦章未報人事改。魏國門前客相弔。聖賢尙覬後世知。萬事那能目前料。方今擢才不待次。道

路紛紛走嚴召。朝廷必欲收真才。豈有如君使常調。讀書適用非苟知。脫略空言直趨要。有餘利刃未一施。可惜青萍反居鞘。誰能出力終提攜。會看驚人露芒耀。君如弗偶好言命。予亦徐當卜耕釣。

送知府吳龍圖

國初以來治蜀者。處置盡自乖崖公。當時奏使便宜敕。不與天下州府同。行之已及八十載。姦宄消伏誰之功。因循至此漸抗敵。有未曉者時相攻。鞭笞小罪亦檢察。不許略出常科中。下民知之頗不懼。州縣往往藏羣兇。側身斂足未動者。實以累朝恩澤隆。公之初來蜀人喜。慈愛久著民情通。衆心歡然恥犯法。挾藥浮薄歸醇醲。盡將約束付僚吏。興起學校還文翁。二年美化極沾洽。遠近循服如偃風。上將歸公問誰代。當使間作如笙鏞。遂求元老得青社。其人廊廟之宗工。往年鎮撫有異績。大旆再來遣于東。公今與之合符去。到必奉詔參夔龍。大資舊德固無慮。剖判自出其心胸。所憂厥後嗣之者。忠定良法還如空。養頑活狡作淵藪。不免剪殄煩興戎。蒙之憤懣久填臆。言賤不得通九重。頌公上殿起居罷。第一用此聞宸聰。

京師逢徐良溫叟明府

弱冠相逢今四十。當年壯氣虬龍蟄。交情獨在酒琖深。人事細論衣袖濕。詩書誤身浪自憐。公相滿眼誰可揖。蒼顏已變長安風。後會更應尤戢戢。

小疾中元恕相別往長安信筆成篇奉送

一春三月少見晴。濕雲不飛壓花老。君來別我西出關。病裏傷離似翁媪。和風吹面纔幾程。卽入風流洛

陽道。司農水利無留行。洛城花開爲誰好。漢唐陳跡到可尋。猶有山川豁懷抱。憶昨行春從魏公。興慶池邊玉樽倒。公今已爲泉下游。往事憑君問煙草。官家諸路急使才。歸對明光切須早。

題可久上人房素屏

雕軒畫室吳僧居。花草禽魚屏面集。豈如蕭爽大士堂。雪山數尺平頭立。滿齋虛白已自生。隔坐紛華不容入。霜毫一掃都無痕。獨有淋漓粉光濕。丹青世上空紆紆。趣與師同百無十。常時吟客唯我來。共愛此屏微靜翕。目睛難駐手試捫。指下瑠璃無寸澀。願乘醉筆留幾行。爲寫高僧白雲什。

送王賓玉

相如昔乘使者車。縣令負弩當前驅。頗矜意氣誇里閭。檄詞爛漫肆欺誣。歸來不說民飢臞。餘佞便留封禪書。江山清絕冠天區。豈廿久被斯人汙。邇來柄靈軼古初。著俊相繼馳亨衢。堂堂御史今名儒。志節慷慨忠義俱。才高識遠器有餘。不似文園淺丈夫。一朝持節歸成都。使星皎皎臨坤隅。輟從憲府恩意殊。霜威鷄擊正所須。姦胥所在密于荼。交券計斤良可吁。鋤凶芟穢忌踟躕。元惡須行七日誅。惡除惠澤益滯滯。頓使枯瘠俱豐腴。坐茵未暖氄氄。詔歸還直承明廬。朝廷急賢恢遠圖。碧雞金馬不用渠。以人報國功難踰。諸生中有何武無。

謝三門提舉輦運宋叔達郎中寄古碑雜言

長安古名都。漢唐以來帝王宅。當時高冠大帶接跡公卿間。聲名大半文章伯。能書寫變跌出意象外。那

踴體法就常格。傑辭精翰在處。勒琬琰。從此關西富碑石。咸陽原頭螭蟠龜負。莫知數。風雨皴剝塵土蝕。荒郊壤宇大者臥榛莽。小者老祠佛廟。往往往龕屋壁。憶初來長安。于此心頗溺。朝披夕購。自忘勸。一紙不吝百金易。豈惟讀辭玩點畫。漢唐往事皆歷歷。始者累一以至百。今既累百至千。未免廣搜覓。古人載書兼兩懼。猜謗今我車載不足更囊積。中郎知我有碑癖。封寄數本跨數驛。中郎中郎雖欲遂愚僻。愚也字學不進格。文不長。翻愧嗜此苦無益。雖然古人亦或有所嗜。又恐一朝捨此。愚意無以適。碑乎。誓將蓄汝永吾好。不已聖猶賢博奕。

謝陳伯成學士

蓬萊仙人。才偉英。三世實以文章稱。持盃玉虹吸澗壑。奮筆金虎燒邱陵。開懷未嘗有表暴。出語矧復無矚矚。超然古人考。是否蔑爾時俗論。愛憎識君始者兩俱少。獨我今也百不能。半載沈疴類瘦鶴。終朝癡臥如凍蠅。醫工診臂卽司命。藥債攪心逾惡朋。煩君數月一問訊。使我多感常填膺。感而有贈不須怪。近來交態猶春冰。

祠部集卷四

五言律詩

李花

地暖春纔半。蹊深氣已暄。風光何處好。雪浪此時翻。勻似金刀翦。裝成玉杖繁。天桃漫相壓。吏部竟誰言。

曉鐘

縹緲驚春夢。鏗轟送曉聲。敲烟出野寺。催月下山城。窗映東方白。燈留半壁明。隱然餘韻在。羣動已營營。

閏月晦日

乾坤一傳舍。日月兩征輪。邂逅逢餘閏。連綿送晚春。巢邊迎燕熟。枝上數花頻。漸暖茅簷日。吾將理葛巾。

落花

林間花自飛。物理不應悲。偶對飄殘地。休論豔發時。有情香水面。無數點河湄。蜂蝶含餘意。徘徊繞舊枝。

因訪楊公濟。遂同步野夫家。省其母。野夫時就試南宮。
馬繫揚雄宅。門過孟母鄰。升堂予獨拜。予拜其母同井子兼親。公濟所居與之密邇萬卷先生富。千金舊產貧。早將安穩字。去慰杏園春。

同楊公濟賦破山得開字

原书缺页

詔書一日至。多士競軒眉。獨有儒林傑。方纒風樹悲。飢腸惟飽學。正口絕柔辭。從古器大者。於中成就遲。
與王仲密諸君泛湖

十月清霜後。孤舟顛氣間。酒邊頹白日。棹底倒青山。境勝歡憂泯。吟頻物象慳。吾儕一笑後。魚鳥伴誰閒。
急棹赴吳門

寒日山尖落。孤烟樹杪屯。水流天欲動。舟急岸如奔。縹緲穿雲角。蒼茫望郭門。片心爭宿鳥。去去近黃昏。
初入汴

山勢隨淮斷。河流帶地渾。嚴風疎樹影。落日露沙痕。客興雙蓬鬢。吟懷一酒尊。舟行那敢緩。霜意滿乾坤。
新鶯

未見攀花宿。纔聞隔葉歌。可憐毛羽細。莫怪語言多。匹馬春風路。輕舟夜月波。數聲來入耳。最奈客愁何。
穀下春日

楊柳長安陌。游車綿繡香。漫傾春日酒。誤入少年場。意氣青雲客。風流白面郎。致身愁獨晚。點檢鬢毛蒼。
寒日前二日對雨

紅濕花枝軟。青涵柳色鮮。未開新禁火。自起欲晴煙。坐臥銷佳節。招尋憶舊年。故鄉游樂地。心折泛湖船。
對雨寄楊公濟

江海歲云晏。雨冥風自淒。葉光羣木洗。翅濕幾禽低。靜榻敲寒枕。孤城隱暮輦。少陵車馬客。催踏草堂泥。

雨中呈丁評事

騷雅丁夫子。年來客路岐。故關春夢後。獨館雨留時。詩有龜兒掌。游須驥子隨。令嗣君家千歲鶴。應解念

歸遲。

歸鳥

日落羣山靜。天寒獨鳥歸。聲悲故巢遠。影入片雲微。蹤跡憐吾滯。青冥羨汝飛。莫爲雙翼誤。須避暗中機。

宿慧安院

積淖厭行路。解鞍欣曲肱。疾風穿敝屋。細雨濕青燈。聒夜有饑鼠。觀空無定僧。中宵塵累息。山水思填膺。

九日病中泊舟召伯堰

采采南山菊。還應滿故園。予之小圃實古南山全家泊孤埭。多病負清樽。木末秋聲老。天涯雨氣昏。鄉關吟望外。愁

淚有雙痕。

某爲府曹伏蒙吳先生以詩見寄謹依韻奉酬

瘦馬風埃裏。蕭疎分亦安。閒趨京兆尹。冷甚廣文官。錦繡頒詩句。松筠映歲寒。天邊師坐闕。南望只長歎。

同盛任道賦暮陰得寒字

野館臨空闊。江城起暮寒。年光去天末。雪意上雲端。自失歸禽影。能侵病客肝。莫將愁對景。入夜轉漫漫。

次韻禮之齋中述懷

僻坐治孤學。取書窺古人。高風凜如在。千載邈相親。欲滿詩書腹。寧規富貴身。獨君知己厚。無亦慮吾貧。
春雨一篇呈純甫賢僚縣庠諸彥。

漠漠陰常結。垂垂勢未收。潤多宜土脈。落久驗溪流。與物知無間。於花似有讎。少年車馬客。惆悵爲君游。
三月大寒偶書短句

上天誰與問。四序曷相干。已季春成暮。當溫氣反寒。農心憂地凍。俗眼惜花殘。我豈殊民意。身爲父母官。
經春罕嘗見花。今出湖上。悉已離披。

飛花何太急。春在豈須忙。亂點不經眼。殘枝猶斷腸。愁看湖色淨。怯照鬢毛霜。回首壯游地。幽襟付淺觴。
山中遇雨

馬上涼秋雨。隨愁入亂山。垂垂衣袖重。點點鬢毛斑。猿鳥寒聲外。漁樵古畫間。片時全嶺暗。急趁暮鐘還。
純甫小池生雙蓮

造化有詭異。雙蓮共萼翻。凌波洛神豔。泣竹舜妃魂。得所雖欣地。猶孤尙笑根。聖朝不言瑞。圖獻恨無門。
和純甫獨往至德上方避暑

敵屋數楹隘。炎曦一線長。梅仙厭煩溽。蕭寺得清涼。山鳥聒幽耳。澗泉獨渴腸。茲遊君獨勝。河朔浪飛觴。
通判國博惠建茶。且有對啜之戲。因以奉謝。

數餅建溪春。求逾尺璧珍。封從鄉國遠。惠與郡僚均。午榻忘搯臂。晨觴厭啓唇。拜嘉當對啜。相待况如賓。

書窗

一室微吟地。開窗更欲虛。入雲驚紙破。照月愛樵疎。野色連朝夕。秋光滿屋廬。何如謝太守。遠岫獨相於。

寄題張殿直長春亭

甲第俯河涓。修亭面勢宜。琴樽長有樂。草木似無衰。境勝青山敵。心閒白日遲。祖良迷大隱。獨與赤松期。

寄題郭明府寺丞穎上西齋

退築謀何早。閒居興頗濃。渠流通穎派。窗列隔淮峯。玉麈談賓盛。牙籤載籍重。雨巾時墊角。一代慕林宗。

奉答雅均途中見寄二首

濁流非猛激。無以頓澄明。此邑先膏潤。今予力潔清。人皆疑矯行。君獨照真誠。一得途中什。謔謔衆口平。

貧固誠吾分。廉斯亦士常。漫多愚執守。媿少子文章。

雅均前篇頗憐予廉貧。復有論文有力之句。

雖幸相逢近。猶嗟此別長。何

時却南轡。重把論詩觴。

觀茶

鬪智不鬪力。一枰思解圍。防人甚勦敵。平地有危機。蝸角爭先後。狼心競是非。傍觀縮手者。往往見精微。

九日過後漫題堂前雙菊

花日金相照。條風翠競翻。誰言羞晚豔。自喜勝孤根。客士深培力。家人一概恩。秋香真好在。未易負清樽。

和純甫紅葉

秋園無豔色。特地起西風。閒向煙林翠。時呈霜片紅。霞光青漢襯。燈炬碧紗籠。不解隨松柏。染裁煩化工。

再次韻和純甫紅葉之什

徒密嗤翠幄。有文殊紫屏。因霜變顏色。點樹作丹青。廢苑掃還聚。疎林生易形。秋風無別豔。祝爾莫飄零。

挺山道中早行有感二首

晨興事行役。寸祿此時輕。撲面風霜緊。隔林雞犬鳴。遙天分淡色。殘月露微明。便欲投簪去。無田可力耕。

宿山寺

蒼莽窮山路。蕭森古寺門。夢清宵殿月。淚迸曉枝猿。人事隨羣動。山情阻細論。城中塵沒眼。愁思滿歸軒。

某承乏東陽周親惠然顧訪未幾告別以詩餞之

親戚富貴合。賤貧宜見疎。獨君從遠道。爲我枉高車。相得未逾月。薄言還故廬。風霜正淒暮。臨別尙躊躇。

晚登至德上方偶書短篇呈山主雲公

城市隔半舍。院距邑十五里好山寧在深。亂雲歸別塢。落日照疎林。能解外緣縛。始堅安住心。冠裳方我誘。漫作愛山吟。

離東坡後寄題義師上方

山水東陽富。僧居更翠微。晴峰露秋骨。古樹減煙圍。啼鳥遠相應。孤蜂閒自歸。予生秉幽尚。夢想在禪扉。

劉叔茂及第後。往廣德拜親。過吳江新治。

今歲同升客。如君有幾人。青年登一第。白首具雙親。喜氣生軍壘。懽迎聚邑民。諸兄在天祿。勉去繼清塵。

惠山泉

封寄晉陵船。東南第一泉。出瓶雲液碎。落鼎月波圓。正味云誰別。繁聲只自憐。要須茶品對。合袞建溪先。

官滿將見舍弟

三歲別吾弟。今歸心始降。從茲得安寢。無夢過重江。預驗鵲音喜。行看鴈影雙。西湖猶可泛。酌酒市羊羶。

途中寄純甫

諸友分攜地。重陽欲近天。共誰搴菊藥。獨立憶梅仙。對飲乖今日。傷離似去年。佳山足吟賞。應自有新篇。

志遠法師挽辭

寂寞湖邊寺。荆溪目已瞑。窗雲猶曉白。竹徑自寒青。野鳥悲吟動。門人感涕零。里無梁補闕。誰可法師銘。

庚子歲除輦下作

呼兒來秉燭。點檢鬢邊絲。志在驚時晚。年加願曉遲。京華猶旅食。世態益吾悲。四十明朝是。愁吟杜子詩。

久雨見月

千門却燈燭。久雨愛冰輪。愁眼開今夕。清光對故人。更長頻側帽。望極反霑巾。幾爲浮雲掩。行藏類此身。

立春

宿凍歸何處。池塘漲暖波。日盤花面永。風入鳥聲和。俎菜堆生葉。闔裳剪薄羅。獨憐詩酒興。早較昨宵多。
依韻和粹中早春

寒威猶壓曉。淑氣已回春。不道朱顏舊。剛憐華歲新。震雷將出地。蟄戶莫存身。漸報鶯花信。眉頭日漸伸。
早春寄擇之

北陸寒威盡。東郊晝景添。風和引禽哢。冰暖出魚潛。草本回生意。乾坤待澤漸。寧知巖谷下。經歲嘆才淹。
正月三日郊外馬上作

長日牽人事。新年散馬蹄。和風吹凍柳。殘雪點春泥。意愜境自勝。興來杯屢攜。徘徊羨飛鳥。曉逐野雲低。
禁烟節同子玉徐先生野步

繫馬道邊樹。杖藜坡外岡。風來花自笑。露過草猶香。樂事論三月。吟懷驚八荒。時平那有感。雙淚肯浪浪。
春色

淺深花面染。來去柳邊浮。雨氣那能洗。年光亦共流。濃濃交綠野。拂拂上朱樓。轉恐紛華眼。蕭條不愛秋。
題劉有方御藥翠巖亭

購石黃金費。開軒翠玉叢。端居憐象魏。遠意自衡嵩。花弄疎簾日。禽呼靜榻風。移山寧有術。未易笑愚公。
升之元真觀讀書

白日無停運。青雲要早圖。寓居隣上士。述作擬潛夫。案冗書籤滿。窗明樹影孤。徘徊拂塵壁。一半舊題無。

送李厚祕校赴相州戶曹

迎婦金貂宅。之官銅雀臺。俱新是婚宦。有素獨詞才。簿領時能撥。圖書日可開。無勞歎州縣。自足脫塵埃。

醉臥

彭澤終朝飲。杯乾入醉鄉。眩頭遺野幘。坦腹委藜牀。吏部甕邊臥。山公馬上狂。何如此安穩。寢興爲吾長。

和叔以琴詩見貽。因成一篇奉答。

製就七絃器。斲殘千古桐。正聲希世出。羣耳此時聳。徽暗列星隱。意存流水空。憑君莫輕撫。留取和薰風。

古劍

只因耕戰地。得此古龍泉。磨拭自今日。埋藏曾幾年。無將試蛟窟。宜待靜狼烟。寄語姦邪輩。當鋒莫向前。

壓書玉兔

白玉雙蹲兔。工深刻楮勞。長疑奔月窟。渾欲動霜毛。似喜書成穴。猶驚筆有毫。案間誰汝待。自覺守株高。

陽睢春日偶書二首

凍柳輕能舞。枯河暖亦流。東風應自好。遠客獨含愁。攬鏡傷吟鬢。無錢買釣舟。誰能終日興。大半在滄洲。

楊柳亡隋岸。風塵舊宋州。寄家盈百指。憶弟濕雙眸。旅宦那能定。人生本自浮。旋酤街北酒。準擬送春愁。

睢陽別包進甫

飲徧長安酒。春風送馬蹄。異鄉憐會合。明日復東西。行興看君速。歸期恨我稽。門前客星懶。到日溜塵泥。

別希魯回馬上口占

兄佐諸侯幕，愚居孝子廬。奔馳他自得，情味獨相於。先送秋帆動，還嗟友席虛。平生感知淚，今日爲漣如。

大風

正月明朝盡，東風半夜狂。乾坤搖蓋軸，草樹拔毫芒。亂瓦飄無數，寒沙走更忙。聖時讒口絕，天令莫乖常。

寄盛子美俞元功二先輩

二君得第後守選寓相國寺習試法。

彼美吳州傑，相從蕭寺居。聊窮三尺律，肯恃五車書。前有殊尤等，行當選擇初。秋風吹客袂，鄉思復何如。
試法新立數等。

寄公立

一朝揮別袂，九日在征岐。識我相思意，如君獨坐時。榴花須滿瓊，菊蕊况盈枝。目下重陽淚，宜看杜牧詩。

寄俞君度

夫子儻已甚，平生心向存。黃金空舊產，白首寄他門。獨酌醉應淺，愁吟聲更吞。飄零那復久，知己有平原。

員外陸先生常恤其貧。

過洛州

朔野風煙古，臨洛氣象存。魏風沿土性，漳水抱城根。故壘盤荒草，殘碑落近村。太平民產富，桑柘半郊原。

祠部集卷五

五言律詩

北都春日

日出車馬道。風來城市塵。關河應自昔。花草不知春。雲靜鳥翮翼。冰消魚動鱗。太平無一事。把酒勸耕民。

出大名府北郭

驅車出近郭。野色感年華。洄靜水猶凍。地寒林未花。細風吹斷柳。殘雪隱虛沙。鄉思東南闊。歸飛羨暮鴉。

馬上口占

出郭塵埃少。驅車節物便。歸心忘澤國。病眼豁霜天。烏雀飛荒圃。牛羊臥晚田。吟邊搖落意。疎木起孤烟。

二月過半猶未見花。昨日逢之珍云。已有小桃。因成短句。

不覺春過半。開花始見桃。年光雙鳥翼。世事一鴻毛。有興撫清景。將愁付濁醪。家林應爛漫。南望首空搔。

偶書呈公勝

朔吹朝還暮。繁雲凝復開。不能成雪意。只解作寒媒。薄宦家千里。長吟酒一杯。西鄰鄭夫子。乘興幾時來。

走筆送楊正臣先輩還吳

客衣沾魏土。歸馬望吳雲。一紀困游宦。異鄉愁送君。驂騑行得路。鴻鴈去成羣。歸省元昆何日江天酒。重論別

後文。

居魏歲餘。未嘗見江鄉故人。今無悔如雄過此。相見甚喜。席間率成短篇呈之。

經年大河北。終日故鄉心。入耳欣吳語。開懷慰越吟。天寒裘領薄。日暮酒盃深。早晚論邊策。長纓試請擒。

新秋夜月寄故人

客心宜靜夜。月色澹新秋。影落三湘水。詩傳八詠樓。何窮對酒望。幾處捲簾愁。若問相思意。隨君萬里遊。

依韻和留臺崔庫部局中自遣

儒林文雅作。蕭散欲揮金。老去安時態。秋來慰夙心。誰陪黃菊酒。自喜白頭吟。賓客霜臺少。詩成每獨斟。

自零口夜至渭南縣作

月黑征途暗。羸駒傍險行。村遙微認火。縣近忽聞更。落寞殊鄉意。喧啾小市聲。故園流水在。想像見冰清。

婦翁嘗宰此邑。作渠引水以溉民田。今享其利。

送長安僉判鮮于子駿還闕

相望蜀父老。應嫌駟馬遲。三冬辭幕府。千里走京師。富貴那能滯。文章自有知。關山含雪意。別酒對秦姬。

長安春日

白入雙吟鬢。衰侵一病身。年光不貸老。春色似欺人。鳥破日邊霧。花飄風外塵。還將感時淚。對酒灑成秦。

題光化和年西嶽碑

唐嶽賢廟題名

瘦硬光和字，崔巍太華碑。鑄模森骨立，點畫宛鱗差。內有通神筆，前無絕妙辭。芽齋千載後，玩古獨心知。

華嶽金天廟，唐賢石闕題。姓名留篆刻，冠劍落耕犁。字體諸家雜，函封數驛齋。幾行猶壯觀，丞相討淮西。

裴晉公征淮西與
將佐題名石上。

斷碑

何代經兵火，終年委雪霜。文章誰黑白，首尾自參商。琬琰那淪翠，塵沙漸變黃。人生異堅石，撫汝重蒼茫。

依韻奉和經略司徒侍中上巳會興慶池

千載蘭亭後，風流宛目前。竹昏烟冉冉，花泣露漣漣。筆落詩推將，盃行酒有仙。水邊佳麗少，春草漫芊緜。

杜工部有三月三日天氣
新長安水邊多麗人之句。

小開西山落日

天地垂垂暮，殘陽似有情。未催全嶺暗，猶放半山明。遠樹微茫見，孤烟慘澹生。流年從此老，對酒急須傾。

翻經臺

失道從僧指，窮高聽鳥呼。三山四迴抱，一徑百盤紆。人事空今昔，臺基儻有無。吟邊嵐氣夕，落日伴猿狐。

題華藏環峯閣

精藍已塵外，飛閣更雲端。只見蒼山合，寧知紫宙寬。客游追汗漫，詩思等巉岏。大士安禪後，何人此倚欄。

羽師院假山

累石作危峯。軒然曲沼中。山形在眉睫。人意自衡嵩。影駭魚蝦避。路疑獫鳥通。宦途尤巧險。匠手草言工。

京兆府初赴同天節宴詩二首

四月薰風轉。三天瑞景舒。歌從歸啟後。壽起祝堯初。詩喜南山對。身甘北闕疎。九韶音未作。朝野自權如。五帝今云六。君王合萬年。日長遲漏水。風細駐爐烟。想像聯朝佩。歡呼捧御筵。喜深恩更遠。不竭似秦川。

哭王仲密四首

相逢初北闕。並試復南宮。失意春風裏。謀歸汴水東。行藏他日異。笑語此生空。不掛青雲籍。聲名野史中。羣居三益友。再拜十年兄。一別長南北。相逢遂死生。淚流添渭水。心折注江城。聞訃悲尤劇。書成僕未行。予將遣僕持親朋書南去。而君書在焉。忽聞其訃。

場屋行遲暮。田廬臥寂寥。壯圖藏翰墨。高行落漁樵。會哭諸朋盛。銜哀一奠遙。繫舟江岸絕。愁望定山潮。多金空舊產。短褐盡平生。蒿里闕春色。桐江流哭聲。人憐天不與。婦少子猶嬰。如有山濤在。應忘顧後情。

依韻和酬鮮于子駿郎中見寄

昨在王公幕。同時輒仰攀。論情昆弟等。知己友朋間。渭北孤交臂。淮陽慰客顏。王公今牧陳復。留兄居治下。長卿看駟馬。父老望西還。

軟毛金縷暗細點雪花。林下遠思母。階前愁傍人。澗聲微可聽。野性漸能馴。公惠成愚好。他年伴幅巾。
長老鳳師新作四照亭。以其環顧洞徹無纖翳礙目故名云。從予乞詩。因卽其說以寄題。

大士安禪外。孤亭曠望中。物無形可遁。心與境俱通。日光應倍。江山氣更雄。寧須面壁坐。到此卽觀空。
留題太平寺

鄉落少人烟。精廬獨巋然。香花真佛界。棟宇始唐年。鳥啄齋餘食。僧參夜半禪。清涼數畝地。已是隔塵緣。
留題東巖院

仁祠倚巖腹。無處入翳氛。古像棲深殿。高僧傲白雲。山花暖自發。谿溜遠猶聞。我正爲名縛。翻羞猿鳥羣。
數日前伏蒙吳先生留飲。旋辱尊什。喜某之來。謹依嚴韻奉獻。

昔荷齒牙論。今猶骨髓淪。報知虧國士。高第濫門人。牆仞欣重到。眉頭爲一伸。却嗟夫子疾。是日臥漳濱。
依韻奉和司徒侍中仲春釋奠

先聖祠逾重。尊儒世適丁。上公儀最熟。太學祭頻經。曉月衣冠淨。春風俎豆馨。魏人休請頌。在泮已言形。
梨花

舊愛樂天句。今逢帶雨春。花中都讓潔。月下倍生神。翫好張瑤席。攀仍贈玉人。莫開紅紫眼。此外盡非真。
雨夜舟中

岸鳴連夜雨。舟繫數家村。防盜頻敲柝。愁吟早閉門。呼兒陳小酌。憶弟動歸魂。安得清風起。吹開波浪渾。

御河舟中

浮舟不用力。一水靜於山。沙鳥晴相喚。河雲晚更閒。微吟窮有象。清思入無間。河策誰云補。從公漫往還。

屐

好在登高屐。東西類此身。遊頻齒幾折。用久蠟還新。晚步憐今日。幽尋憶古人。莫隨珠履客。且伴白綸巾。

夜坐

城裏更籌急。牕邊竹影微。掩書雙淚迸。撫事寸心違。歲月辜華絨。風霜感彩衣。陶潛空自賦。何處有田歸。

韓魏公生日

三秋開爽氣。七月降元精。致主鈞樞徧。尊賢袞鉞輕。顯庸歸社稷。陰相在神明。漳水流無竭。年年伴壽觥。

九日

霜淨乾坤闊。登高極古臺。秋聲楓幾落。客眼菊三開。短髮頻看帽。寒吟間引盃。籬邊空意緒。難得白衣來。

庚戌歲除

薄宦三冬暮。殊方一紀餘。笑歌筋力倦。勦業鬢毛疎。道路紛乘傳。軒墀速曳裾。無庸看半百。搔首歲云除。

依韻和張文通中舍寄韓師元判官

從容須陞對。蕭灑待家居。近閣從戎筆。閒裁寄舊書。青衫逾一紀。黃卷尙三餘。聞說山齋好。何時遂曳裾。

送譚供奉

丹山靈鳳質，偶別帝梧飛。忽憶華林好，還收倦翼歸。綠深宮樹合，紅薄苑花稀。重到迴翔地，卑棲嘆昨非。

次韻仁叟禁中清曉

禁廡休夜直，瑞靄向朝敷。華闕辨雲氣，紫宸低斗樞。帝梧鳴彩鳳，宮漏息銅烏。日出將臨辰，天光冒海隅。

送陸覃校書赴選西上

朝飲送春酒，暮吟傷別詩。予愁鶯語亂，君興馬蹄遲。五府何時辟，三銓會早辭。回鞭晉陽道，不負細侯知。

次韻盧六員外避暑

城市苦歎暑，辱涼到水窮。環林得高蔭，解帶取微風。渴肺舉盃緩，汗膚兼酒紅。當年河朔會，舊事豈全空。

中秋京師對月

今夜皇州月，秋光共幾分。未全成皓魄，猶勝隔浮雲。白髮愁偏照，清樽喜獨醺。遙憐江國弟，北望首應勤。

悼承天月禪老

祖意生來達，詩心老去專。傳燈與誰子，絕筆在何篇。朝客散談席，野禽窺法筵。唯應軒北石，秋後自依然。

送蹇礪翁都官赴倅梁門

子與礪翁同年，誰士南宮同舍，復北都幕府交承。

共昔登龍客，仍今同舍郎。後先趨帥府，南北重離觴。塞角催秋月，邊烽落曉霜。軍城看趣召，能久賴王祥。

久雨初霽對酒偶作

彌月窮山雨，昏昏氣蔽天。南榮初見日，萬瓦已生煙。節物驚殘臘，權期減去年。愁來搔短髮，對酒且陶然。

仲冬十六日登馬步

提撈轡險徑。喜隨雙炬紅。薄雲籠淡月。苦霧捲嚴風。馬害誰云屏。神休覲所蒙。晨門未開鑰。殘夢續齋宮。齋宮獨酌待曉入城。

青燈頻照面。黃卷懶低頭。危坐自醒醉。孤斟誰獻酬。簷前落星宿。城裏息更籌。上馬卽塵事。欲歸欣少留。贈杜謬祕校

唐代詩人傑。家居世杜陵。祖風今不墜。君學善相承。氣直橫秋鶻。文雄絕漢鵬。風騷如命將。壇復讓誰登。杜以詩和答依元韻贈之

子美沒已久。正風幾替陵。上天憂道喪。遠裔以詩承。鶻足輒追駿。鷗心聊慕鵬。微之重堂奧。努力願同登。送范令巽之赴陝縣

陝人西望眼。唯認馬蹄東。柳縣追陶令。棠郊謁召公。問農游手勸。聽訟下情通。千載萊蕪後。傳家有素風。送同年張正臣赴海陵幕

早年登甲選。從事又東藩。地與淮流絕。城連海氣昏。好山供健筆。暇日樂清樽。多著太平策。歸來奏帝關。寒燼偶坐戲呈任道

人事車輪轉。年光木葉催。交情論晚歲。生意共寒灰。未足勝寬褐。那能煖凍盃。知君尋氣類。不爲附炎來。依韻和仲靈禪師喜賈丞相趙翰林見稱輔教編之什

浩蕩藤州老，雄文鼓大編。聲名元自重，述作許誰傳。成誦慙空久，相逢偶未緣。承明內外相，交口譽師賢。
送覺上人還雲

下山風月古，秀發在詩人。之于含清骨，禪師託後身。千篇收篋藁，一人繞鄉蘋。知己大丞相，無勞揖縉紳。
依韻和彭九及之歸養之什

江南春自好，蜀客亦思歸。淚與花俱落，心隨燕共飛。露章還子舍，孝理副宸闈。禁署風流後，謀漁未有磯。
送宣州太守沈司封

宣城從古勝，謝守擅風流。夫子名當世，君王付此州。訟鈴閒郡閣，吟筆動江樓。莫憶窗中句，能詩今隱侯。
送王天常太祝詩

雨洗春枝冷，鸞愁晚更啼。感時雙淚落，送客片帆西。淮隰逢鴿羽，令弟祕校京塵縱馬蹄。有才無殿課，安穩步通闈。

方殿省示惠遠祖先生詩集

先生名不死，三百幾年間。白首吟唐世，清風起越山。遺編流自久，異代許誰刪。遠裔傳能事，斯文氣欲還。
屬疾

壯懷衰獨早，樂事病全稀。靜聽聞花落，欹眠見燕歸。冠裳成外累，塵土汨真機。強起親曹事，遙慙舊隱扉。
予累日臥病，適張文通惠教，亦云服藥漫成小詩呈之。

功名心寸折。歲月髮雙逢。病畏酒杯綠。愁憐花藥紅。杖藜成暇日。行樂步春風。唯有張公子。翛然此意同。

暮春被病感書

孤直難知己。才華反誤身。流年銷壯節。多病對殘春。酒到心如達。花空眼亦貧。賢愚通塞理。誰與問洪鈞。

聞升甫南池觀魚所獲無幾戲成小詩奉呈

巨鱗非尺澤。多目漫污池。網漏從今日。筌忘復幾時。甕人顏慘淡。漁子興參差。豈似任公捷。羣鰲一釣絲。

病起觀盆魚

戢戢駢頭戲。悠悠掉尾行。莫言盆盎窄。猶勝網羅橫。競觸浮萍亂。時吹細浪生。嗟予遭病縛。羨汝遂微情。

送王明叟赴秀州法掾

去去持丹筆。當官議是非。壯心低仕路。戀涕濕親衣。汲浪橋烏急。吳霜稻蟹肥。論文杯酒後。從此古人稀。

行叟權秋掾比回正老以詩寄之因次韻奉和

郡獄乏掾屬。君才盛府依。犴牢煩暫掌。鸞枳復卑飛。盡室輕裝去。新吟滿篋歸。風流傷別處。粉淚洒紅衣。

送石亢之節推赴廬州幕府

執政昔曾祖。滯才今令孫。三遷纔大幕。萬石已高門。阮瑀妙草檄。毛公深雅言。度支毛伯相從賓主樂。淮月共清樽。

送子立榮侍南歸

有客就征騶。風前別酒酣。慈顏依膝下。歸意滿江南。去路草初歇。到家梅正含。短書無惜寄。別後抵清談。
上何太宰生日二首

斗杓西揭柄。南呂已飛灰。芝室占熊夢。蓬山挺梓材。世欣金鷲見。人慶玉麟來。天意非難料。行看位上台。
皇穹符寶運。嵩嶽降眞賢。明月中秋後。黃花九月前。潭潭新紫府。疊疊舊青氈。遐想靈椿慶。春秋合幾年。
漁者

身世扁舟裏。飄飄可奈何。萬生勞白日。一笑屬滄波。闊網施能幾。閒機用未多。予顏自憔悴。莫作楚臣歌。
對雪六首

幾尺江東雪。同時戶北風。全家愁坐外。寄命苦吟中。已分書帷冷。偏憎酒盞空。漫將豐歲兆。去問白頭翁。
草樹驚全失。山河望轉非。片時藏地險。底處極天圍。樓半輕相逐。簷前急自飛。乘風還有意。故去點人衣。
飄洒三冬暮。蒼茫一氣凝。寒威斗自壯。空色曉逾澄。狂走尋岡兔。飢呼失樹鷹。年來交態淺。有興卽誰乘。
影亂侵書幌。花輕輟酒盃。襟懷同落寞。氣象亦崔嵬。屢折參雲竹。偏凌照水梅。紅爐方爾附。未可論寒灰。
色浮千里白。氣逼萬家寒。獨鳥飢猶啄。癡兒喜自團。向風初舞急。入夜轉聲乾。此味同誰冷。吟窗映素冠。
朔風吹不盡。顛氣入無間。市井人喧息。江湖鳥翼頑。酒邊驚晚歲。吟外失羣山。溫室便高臥。明朝任塞關。
次韻答承天月長老

方外得師晚。相逢出古心。交成真合水。意在始知琴。官路塵泥久。禪扃歲月深。清風貽絕唱。一誦快煩襟。

塗中書四十言奉寄武陵則師

師有知人術。一言珍萬金。聖門防取貌。吾道素論心。越樹秋聲起。武陵歸思深。桃源千載事。此說更難尋。

書香嚴屋壁呈寺主隆師

莊嚴模淨域。金碧照晴霓。土木有時竭。樓臺無日低。林泉藏好處。巾屨得安棲。我媿陶彭澤。煩師數過溪。

詩送長老芝公歸靈洞

昔以醫名著。今茲祖意傳。衆生如不病。大士自安禪。貌等澗松古。性同山月圓。應防猿鳥憶。卻指舊林泉。

贈淨土嵩長老

林泉久安住。心境兩無塵。禪外牽餘想。詩中老此身。虛懷延海衆。雄辯服談賓。偉特如師少。相逢悟宿因。

贈霞長老

大士本宿植。妙年離世紛。定心馴海鳥。詩語淡秋雲。與物曾無著。收聲恐有聞。唯將諸祖意。晚歲導迷羣。

酬齊上人

不見湯師久。病眠時序深。忽驚朱夏過。真負碧雲吟。他日虎溪約。同時鳳闕心。未應論去住。杖屨且相尋。

景山無思二大師。重和鄙詩。復依前韻奉答。

西北塵游倦。東南野興深。帳空慙鶴怨。山暝憶猿吟。大士真交臂。連篇契夙心。會須攜蠟屐。雲嶠陟千尋。

送臻上人還雲山

半歲風埃地。終朝雲水情。身兼飛錫健。眼向故山明。不改禪衣色。從來野麩輕。煩師伴發鳥。兩耳厭車聲。
詩贈圓公大士

恐是逃名客。因爲出世流。人間雲不定。心外佛何求。醉喜形骸放。詩嫌偶對囚。我應遭竊笑。聲利乃身讎。
仲靈禪師以詩見邀。輒走筆依韻。附還使奉和。

世好元難合。便甘或棄辛。喜師同肺腑。偶爾異衣巾。文約常牽俗。詩情遠過人。相邀松下別。山意入秋新。
送李講主還維揚

定憶娑婆樹。雙垂滿地陰。院有雙樹春風吹社燕。歸意逐淮禽。帆落橫江盡。門開小院深。先搥大法鼓。續震海潮音。師之來杭實幹法鼓

仁宗輓歌詞四首

未乾宮硯墨。猶暖御爐烟。雞唱空催曉。龍飛忽上天。攀髯三月暮。洒淚五雲邊。盛德無容報。塵埃萬壽篇。
飛帚飄宸翰。賡歌縱睿才。歌權三閣燕。聲轉兩宮哀。人世金滕祕。天門玉鎖開。年年初夏月。寂寞壽山杯。
輕徭寬日力。橫費惜秋毫。臨諫天容睟。尊賢聖體勞。乾坤收化育。弓劍入悲號。十月西陵仗。愁雲隔赭袍。
聖運一千載。君臨四十春。寶圖先與子。妙斷獨如神。瑞表虛南極。哀聲動北辰。天鍾堯舜性。廟號訖稱仁。

石太保輓詞

許國三朝老。傳家萬石君。乞骸章未報。沒齒訃先聞。挽鐸搖秋露。銘旌卷暮雲。龍岡逢吉壤。馬鬣寄高墳。

王廣淵郎中輓詞

一門新茹痛。八座近云亡。凋謝仍賢者。風流失望郎。葬帷籠淡月。挽鐸訴清霜。祖烈繫誰紹。三槐老北堂。

王子直輓詞二首

流水身飄忽。青雲意闊疎。儒林看作傳。使者合求書。野月隨丹旆。山烟濕素車。寢門今日淚。一灑爲無餘。

王氏仍淮水。賢人減潁川。風流今盡矣。天理舊茫然。親涕霑封篋。交情動絕絃。公卿誰不到。偏天賈生年。

晉陽郡君輓詞二首

舉承相之孫。諫大夫之妻。

法度居無失。圖書動有稽。不偕君子老。空美大夫妻。淡月臨新兆。清風在舊閨。哭聲摧隴木。山鳥學人啼。夫賢徹子後。身貴畢公孫。獨棄斑衣養。空餘象服尊。悲風纏挽鐸。苦霧濕銘旛。誰謂靈香驗。何曾見返魂。

祠部集卷六

七言律詩

立春

北風已作東風客。昨日何如今日暄。造化有期尋萬木。陽和無迹走千門。土牛陌上摧花杖。玉燕釵頭綴綵旛。獨我題詩添意緒。又看殘臘委冰痕。

春日山中感懷

春色酣酣破宿霾。春心袞袞瀉長淮。無情草樹相看久。得意親朋一笑乖。世俗冰霜誰暖眼。古人金石已枯骸。愁來獨對青山坐。唯有東風入舊懷。

贈楊尉純甫

君家茂族出關西。壯氣長於萬丈霓。羣鷗羨鵬舒海翼。衆鷲觀驥聘霜蹄。詩才多慕謫仙逸。宦緒猶嫌梅福低。千里霄程方策足。莫云今日是卑棲。

若師院詠筍

戢戢新芽迸舊林。纔生有節便虛心。已鄰佛界黃金地。更學仙家碧玉簪。失灌要須防倦僕。偷餐切莫聽飢禽。憑師養取成脩竹。截管終令作鳳吟。

席上次韻純甫牡丹

絕艷濃香一倍繁。青春歸去已珊珊。障風護恐檀心損。和雨攀應玉手寒。今日我來頻舉爵。明年誰與共憑欄。盛傳京洛多名品。未得尋芳洗眼看。

寄湖掾楊浩然

新持手版若溪掾。應恨浮名別故鄉。澤國幾瞻飛鴈序。令弟公濟在杭春風自入墜鱣堂。坐曹未改生平好。開卷能如往日忙。龍首主人監郡樂。定蒙賓禮考文章。

送春

年年不會春來處。疑自深紅嫩白間。今日却從何處去。明年依舊待君還。不堪眼見鶯花老。安得心同木石頑。身外韶華猶可再。其如綠鬢與朱顏。

經和靖林先生舊隱

獨行先生舊隱荒。大名寧受一棺藏。能詩秀骨應無朽。近塚閒花亦自香。卷軸門人收篋筥。歲時族子奉烝嘗。隱居不娶諸族承嗣逸民未許先賢傳。猶說梁鴻有孟光。

贈陸元象文學

漢世最優文學掾。因君官稱復榮今。青春事業收名路。白首光華照士林。風月每邀花底醉。乾坤共老水邊吟。安車正好追先烈。子舍唯增二百金。陸賈五男令君愛嗣六人

依韻和陸丈瑞香花

花下詩翁已富情。愛花相詠句還成。纔開秀格能殊衆。到老清香不負名。世上流芳歸幾處。江南傳價入中京。乾坤定是憐馨德。那許風前趁落英。

競渡

書鷁追風千楫動。錦標翻日萬人呼。驕龍戰水爭先後。采蜃橫川半有無。波底魚蝦愁破窟。岸傍車馬看盈塗。競心猶出功名下。吟倚扁舟進一壺。

謝純甫惠筆

勁管毫尖匠製宜。故人珍贈我何爲。分殊定遠初投日。得似文通舊夢時。大手媿無才翰用。正心惟見友朋規。紛紛紙尾方勞署。辜負詞林視草詞。

次韻和純甫秋陰悶書

乾坤泱泱作秋容。節物情懷兩莫窮。山雨欲來陰竟日。溪雲不斷氣浮空。賴存樽酒時傾綠。更有歌裙可醉紅。偶爾登臨愈興感。朱顏容易變衰翁。

再次前韻

曉曖秋旻氣象濃。對時覽物兩無窮。纔開又合烟光重。欲落還收雨意空。直恐客頭先老白。却思日脚帶斜紅。天真不擾無餘感。誰似前溪下釣翁。

純甫出近郊以梅花未開成篇見貽因次元韻奉酬。

湖吹鳴時萬葉黃。獨留瓊藥擅幽芳。水邊野外開雖晚。臘後春前賞未忙。素艷若敷應雪妬。嫩心猶闕已風香。此花更是梅仙詠。消得花間飲百觴。

過練湖

湖畔難尋使者塵。湖光猶照旅人衣。氣蒸澤國能無潤。隄貯雲天別有圍。楊柳經霜相對老。鳧鷖飽食自由飛。繫舟索紙題詩句。更把閒愁付落暉。

題吳山伍子胥祠

江上胥山古水陰。祠堂氣象亦蕭森。江雲不散憂君色。山月猶明死國心。遷史簡編今斷缺。吳人牲酒日肥深。鄙懷異代悲忠烈。一拜威靈淚滿襟。

資國山口石橋

前日枯槎接斷溪。今朝白石跨完隄。牧兒靜立牛磨角。詩客閒驚馬駐蹄。澗雨漲來流淺瀨。山風掃過斷纖泥。十家豈乏相如輩。當有人從柱上題。

立春

魚尋細脉上輕澌。鳥趁微和啐好枝。多病強傾春日酒。苦吟還接暮冬詩。江南信息梅應藥。京國風流柳未絲。最有佳人隨節序。斂頭綵勝競垂垂。

送朱郎中得謝歸淮南二首

一束衣冠四十春。公今收得自由身。朱顏出任看同輩。白髮歸榮有幾人。何處覓金分素里。只聞行路羨清塵。扁舟急解隋河纜。猶恐京埃汙葛巾。
天香猶在入朝衣。早見都門解綬歸。晚歲高風增慷慨。今宵列宿動光輝。誰供白酒開談笑。自向滄洲洗是非。從此淮禽相看喜。沙邊不復背公飛。

次韻酬答胡一之

六科頓網索豪雄。巖穴賢羣爲一空。夫子獨沈窮巷底。故人多列要塗中。君之交游多在顯貴志行應在功名早。欲大難爲富貴充。年未平津學晁董。佇觀畫錦耀江東。

立春輦下作

雪意徘徊收臘尾。風光迤邐上花梢。強傾浮蟻嘗春酌。終似南禽憶舊巢。愁裏年華侵短髮。吟邊生意滿東郊。玉盤絲菜無消息。索寞空齋畏客嘲。

依韻和擇之惜春

何門織婦爲春魔。幾聽啼鸞暗輟梭。美釀入脣宜莫算。芳期屈指已無多。近風柳絮飄都盡。著雨花枝落半過。正好狂歌對餘景。休因節物嘆蹉跎。

寄陳介進士

聖門顏子最稱貧。猶有簞瓢奉一身。罕似飢腸游太學。獨將生意託洪鈞。常時閔笑遭流俗。今日依歸得主人。早夜從容諮道誼。切防事業去青春。

次韻和秋扇

形如圓月色欺霜。曾許佳人掩面藏。袁守揚風方慰愜。班姬中道忽悲涼。自知掌握初經用。豈顧塵埃此暫傷。只恐來年清暑殿。別將紈素上君堂。

月卿大師以書抵予。言到自永嘉。今將還杭。因索詩送行。聊書短章。寒來請之勤。

京洛多年作意遊。瞥然歸思滿林邱。塵衣纔洗吳中水。吟錫還尋海畔州。還杭未幾。復游永嘉。獨夜揮絃泣山鬼。師能幾句談妙動藩侯。溫守劉侯。延師講經。孤雲高跡真無定。又理輕裝買客舟。由永嘉赴婺。復將還杭。

菊

花濃新出黃金鑷。枝軟輕垂綠玉條。正色逢人何太晚。清香到酒亦終朝。籬邊此意同蕭瑟。霜後無言對寂寥。凡卉不爲孤艷地。淵明眞賞欲爭邀。

立春

殘臘新春判此朝。斗寒猶未動寅杓。白催曉色融冰片。綠轉風光入柳條。絲菜落盤隨玉手。縷花垂勝厭金翹。六年不見江梅影。長覺歸心似旆搖。

次韻丁評事春雨

溪樓燕子懶飛飛。一鼓輕雷驟作威。細濯林花紅抹淺。低蒙岸柳翠光微。偶穿縱步尋山屐。且解銷憂買酒衣。華表有人還未得。更堪取次送春歸。

送王文玉歸浙

插旗打鼓放船頭。二紀蓬萊一夢遊。回首誰能顧庭鷺。收心自可近江鷗。盤堆玉縷鱸初膾。盞溢金波酒旋筍。嘉興酒有金波者。摩詰定懷廊廟弟。新詩未免到皇州。維弟縉也。

依韻和達夫泛湖之作

雨意隨雲却上天。山頭已掃欲晴烟。柳條不盡空圍岸。荷葉猶新未礙船。時序百年催樂事。乾坤一笑入詩篇。主人著姓平原後。莫惜金樽醉綺筵。

賈麟自睦來杭復將如蘇戲贈短句

春風那解繫狂遊。朝醉桐江暮柳洲。大手千篇隨電掃。孤蹤四海學雲浮。榮名不落閒宵夢。退築聊爲晚歲謀。老橘殘鱸猶有興。片心還起洞庭舟。

題於潛張明雨愛拙堂

高酒潛川愛拙翁。堂閒雅興拙情同。宦塗恥用機心達。聖世寧爲直道窮。千載姦纖羞白骨。一時夷坦擅清風。邑人三歲觀賢化。巧詆銷萌訟詬空。

月夜與陳行父楊公濟吳常甫出詣蔡子難

月色無雲喜共看。葛衣藜杖到君邊。宦遊易作浮雲散。人事難同好月圓。菊露凄清吟可老。竹風幽酒坐疑仙。明年席上天南北。行父常甫各將赴治合破高齋此夜眠。

丈人生辰

纔過中元九日期。人間最重早秋時。當年毓秀凝天粹。此際生賢作吏師。候屬金行資義節。氣鍾庚宿究兵奇。願公大用齡盈百。歲歲長吟祝壽詩。

依韻和楊公濟喜嘉定帥王待制移成都

把詔心先劍外飛。一身與國繫安危。玉關落日辭金印。錦水春風轉繡旗。歷見本朝歸秉軸。多由全蜀出分麾。少陵漫爲知音喜。行到花溪已恐遲。

聞楊公濟冒寒訪契嵩上人

凍雲朝濕萬峯寒。鑿齒辛勤訪道安。世外更無吳水石。林中還有晉衣冠。襟期飄灑隨煙靄。詩句縱橫出肺肝。見說松門長不鎖。夜涼猶過別山看。

楊公濟歲暮惠酒

紺餅白酒下吟堂。洗盞傾甕肯漫嘗。寒屋自融春日面。煖盃能轉少年腸。山妻相對驚愁破。稚子無端笑飲狂。百歲光陰空自遠。醉時苦短醒時長。

經春久雨未嘗尋芳。舟次黎驛始見桃李花。紅白成陣。愛而有題。

春風不散三冬雪。暖日猶明五月霞。病眼漫開常見雨。客顏新破始逢花。故園何在情還劇。舊驛空存使
轉賒。白白朱朱今頗驗。退之詩句亦天葩。

曉出

一聲殘角繞千門。霜氣涵空亂宿氛。車馬往來無僻地。星河收去有閒雲。予生慘淡身宜佚。人事崎嶇足
反勤。漸喜太陽浮海面。羣鴉鳴噪尙紛紛。

依韻和酬楊公濟澄江見寄長句

子美幕中瞻暇日。喜傳幽事到京華。地偏浙水開孤壘。風散江雲覆萬家。日出魚蝦來早市。潮空鳧雁落
晴沙。羨君吏隱能終歲。却恨吾遊未有涯。

九日至嘉禾

赴泗州理
緣途中作

登高時節異鄉中。回首家山隔亂峯。白酒莫辭今日醉。黃花不似故園逢。苦嗟節物經秋老。贏得情懷爲
別濃。却愛紫微詩意好。笑歌開口強爲容。杜牧有塵世難
逢開口笑之句

知郡都官示答盱眙周令詩有感而作

臨淮郡事素稱繁。太守才明此典藩。每歲欲甄羣吏狀。是人思出大賢門。孤生自恨方趨走。末跡無緣被
薦論。異日願公持大柄。舉身猶足望洪恩。

送前水監王仲賢郎中赴闕

素節清名照水臺。夷塗行聘忽徘徊。驚人險句何妨露。向闕丹心未可灰。馬勒春風朝弁集。雞呼曉日禁門開。從來早賜清閒對。不信君王肯棄才。

病起偶書

病眠官舍趣方高。強起區區視冗曹。當世纖機漫蝸角。除身萬事盡鴻毛。田園歸去古稱達。軒冕儻來人自勞。汨沒青衫踰壯歲。窮通一任大鈞陶。

感懷寄楊公濟

身世飄飄水上萍。時情暗淡草邊螢。百年日月空憂喜。一笑乾坤任醉醒。此外浮沈俱委命。相逢汝我卽忘形。尋山各有襄陽馬。莫遣題詩筆暫停。

冬盡日睢陽感事

天邊秋緒細如毛。眼底詩情付濁醪。張許忠魂空日月。河隄巡遠。雙廟在焉。鄒枚樂事委蓬蒿。積成鄉思心頻折。送盡年華首重搔。杜子南賓猶此日。主人恩意覺徒勞。

依韻和尹嗣復仲春會食船場

野色寬圍四繚牆。一穿林徑百憂忘。濃花細草青春半。語燕遊蜂白日長。寄興不知詩筆倦。惜時猶喜酒杯香。席間數點殘英墜。萬片隨風此濫觴。

次韻酬禮之見貽

慶歷天王設羅網。君時遺俊我登科。當時未識名猶熟。此日相逢分固多。摩戛青雲知志在。驚嗟素業恍時過。朱顏皓齒偷歡處。暫置功名任酒醅。

再次韻禮之見貽之什

傳家素業志雄軻。烏足區區羨決科。以道自尊今古少。不才而第葦麻多。聖門奧闢期君至。賓館清談許我過。文酒有時留劇飲。長教阿買到醕醅。予不善飲。

次韻禮之淮上吟

泗上風宜舊罕傳。邦人誰說貢鱗鮮。隔淮小市若古畫。接楚遠山疑宿烟。民舍卑窪多困水。農疇磽瘠少逢年。顧予居里號繁勝。舉目只爲鄉思牽。

董役河上風霾繼日

春遲地冷日蕭騷。野曠林疎風怒號。舂鍤一聲赴蟻垤。旗幡四面落鴻毛。黃埃成穗坐還積。綠鬢欲絲歌漫勞。暫閉柴荆如避寇。江湖歸思入魚舠。

排岸判官以荷花爲祝書五十六字以謝

江國芙蓉夏最繁。臨隄每見尙盤桓。清淮況是稀疎有。紅萼爭教取次看。曉艷不隨生意絕。孤根寧減舊時安。主人知我江鄉客。弗忍池邊獨自觀。

九日上兵部

重陽無酒上高臺。冷對西風笑幾回。雖信佳辰從古重。不知今日爲誰來。忽聞天外清歌發。云是淮邊曲。宴開自歎弗如籬下菊。此時翻得伴吟杯。

謝徐屯田惠海味

儒腸多病怯肥羶。海產從來獨所便。淮甸風宜乖素嗜。江鄉水品憶經年。分甘已佩公情重。加飯寧須俗。臍度。食箸不停資大嚼。免教饑吻鎮流涎。

常尉攜酒饌就部役所見勞

酒蟻清香綠盞飛。河魴雪縷玉盤肥。三春花草殊南北。一笑乾坤外是非。膏血生民勞版築。筋骸薄宦走。都畿。陶潛此日方蕭瑟。那管籬邊遇白衣。

詠鴈

乾坤搖落滿風霜。候鴈來時道路長。玉塞哀音驚遠戍。滄洲寒影伴殘陽。燈前客鬢愁雙白。天外鄉書斷。一行。莫倚善飛江漢闊。暗中增繳絕須防。

立春後連雨

春風自動故園枝。未見終朝不雨時。遮莫年光浮水嫩。定應春色上花遲。山川慘淡隨人意。車馬艱難誤。客期。萬瓦烟青猶足慰。始知井屋有晨炊。

春日感懷

壯年不覺登三紀。正月如今過一旬。人壽短長難定準。春期九十更逡巡。縱當簿領無餘暇。自合眉頭且強伸。况值山城公事簡。不謀笑飲是癡人。

獻知府張少卿

當年直氣吐虹霓。因使平津位晚躋。大筆驅馳爭化匠。織機擺落得天倪。名隨婺女雙溪遠。詩壓休文入詠低。官是諸卿郡山水。志完寧獨在公圭。

邑齋偶書

作邑窮山奈拙何。簿書期會損天和。卻緣衆醉獨醒甚。翻覺同舟敵國多。豈願有人張巧舌。第憂無術拯頽波。偏親垂老妻孥小。獨媿淵明歸去歌。

寄題甘露寺文岳上人環翠閣

鐵甕城邊古道場。近來人說贊公房。江盤北固山形轉。雲抱南朝樹色蒼。世外青鴛誰結構。坐間紫鴿自迴翔。十年滯客空吟想。未識諸天在上方。

送呂貫中

陋邑相逢樂且敖。一杯纔了又丹醪。酒因校戶知君大。茶爲論饒覺我高。忽對溪山揮別袂。却憂茶酒寡同袍。勉哉各努當年力。無使功名見二毛。

寒食值雨

山城寒食已冷落。更值暴雨過園林。餘花似對晚春泣。好鳥時傍殘枝吟。況逢節物宜笑飲。莫待老大惜光陰。明朝雖晴未可出。溪水溢路浮泥深。

郡判鄭世表庫部奉使陝西

心馳關右氣軒軒。笑著征袍謝別樽。面對延和知遠器。力城東洛是名門。邊需前去勞多算。疆事歸來聽一言。洮隴居人瞻漢使。此行知不爲河源。

久雨不果行樂。偶書短篇自戲。

年來窮出少見日。十日陰雨一日晴。春色于人既無分。酒徒與我宜違盟。林花及時亦自蕊。山鳥應節猶知鳴。況復吾生異花鳥。何爲對景如忘情。

粹中先輩以甘雨時降。兆爲豐歲。過形雅什。猥推涼德。輒次元韻。以答來覲。

字人無狀序宜愆。何意天心獨不然。甘澍未嘗差十日。豐儲應使足三年。井廬但覺塗歌溢。水旱寧憂牒訟煎。自是化工蘇百穀。誤褒多謝邑中賢。

元卿舟次丹陽。讀予與諸君前年送別聯句。因作以道南還愆期之意。遠垂寄示。輒依元韻和答。

歸舟南過練塘時。重閱前年送別詩。人世闔棺方始定。客程流梗固難期。君還里閭尋三雅。諸君尙在東白我尙出城守一枝。今予獨處浦陽涵碧春來應倍好。何緣吟對舉清卮。

以詩還府推楊學士無爲編辱佳篇見答。謹次元韻和酬。

貧諷高吟日幾回。辭珍轉覺意逾瑰。子雲天祿慙餘地。工部花溪揜舊才。渴肺喜因秋水療。病眸驚對交光開。今朝那獨誇榮貶。吏貯私囊耀後來。

秋日詠樓感懷二首

公踰四十歲方強。未怕秋風作鬢霜。人物此時仍富樂。襟懷無事可悲涼。嚴塗行取青氈物。末路寧同白首郎。滿目溪山宜曠望。醉提北斗挹霞漿。

搖落秋旻一望長。浮空顛氣白如霜。樓頭待月郡城晚。水底有天江國涼。却恨人生如寄客。未容年少卽衰郎。除非爛醉酬清景。莫惜千金換斗漿。

和人食橘

洞庭一夜落清霜。枝上新苞葉底黃。摘去金沙搏作顆。剖來玉露結成囊。嶺頭梅小酸無味。渭北梨蠹冷欠香。合薦甘馨調鼎實。未宜登俎奉君嘗。

戲贈孫師尹

是非不到酒樽邊。樽散誰呼小謫仙。天上浮查空有路。人間種秫獨無田。花明綠野吟毫秃。月近青樓飲帽偏。姓字未勞金簡記。聖經方倚大儒傳。

程舅夜見過

風雨衡門此夜開。羊曇喜報謝安來。病眸強對題詩燭。感淚頻添話舊盃。江上索居空歲月。渭陽故事未

塵埃不眠且聽寒更坐。日夕相過復幾回。

苦寒

南雪今年幾尺高。林飛壙走亦嗷嗷。閭閻易冷無烟火。巢穴雖空有羽毛。對客懶能傾凍酒。令人自媿著溫袍。何當萬丈縫狐貉。寬作良裘覆汝曹。

謝知郡郎中惠酒

祿鍾不滿俸錢慳。伏臘纔周聚族艱。僅足晨羞供色養。未能日飲樂慈顏。醇醴獲奉偏親壽。珍重緣從太守頒。詩雅百壺跨寵贈。豈如公惠敵邱山。

梅

牆邊幾樹玉參差。照影幽花冷自宜。香陣晚交風破蕊。粉花朝濕雪融枝。故人消息從誰寄。造物生成似我遲。且慰蹉跎盡詩興。江樓閒笛不須吹。

寄劉道秘書

夫子文章老更工。六經俱達一身窮。爲逃州縣時情薄。不問田園歲計空。別酒亟思傾夜雪。書郵忽喜寄春風。遙知父子傳家樂。却笑當年論異同。子舍賢。夙尤得家學。

春盡

江花飄去不留春。海燕飛來獨語人。局促年光花過眼。飄飄生理燕謀身。壯懷已入雙蓬費。樂事還成一

客塵唯有濁醪存妙趣。不容憂喜擾吾真。

涵碧閣東陽山水佳處。予聞且久。獨未能往。近得進士與邑官唱和詩。讀之景物依然。如暫經目。因次元韻。附諸篇之末云。

山水相和碧色鮮。中間飛閣插雲端。水聲噴薄如孤瀉。山勢巉巖復對盤。唵恐昔人精魄笑。劉禹錫方到疑盛夏骨毛寒。流觴已往雙魚在。懷古探奇兩事干。干詩在焉

依韻答元卿

手把周詩媿暗投。爲論昔會覺難酬。巨盃既醉行無算。大句相塵敵固求。別後溪山應故態。近來寤寐憶前遊。致身不早真吾恥。猶喜清醪尙黑頭。

某蒙太守盧公惠酒。因作詩以謝。公子仇香遽賜光。和復次韻敘事酬答。

予懷天地惠何慳。賴有仁侯念拙艱。塵土未嘗輕俗狀。風霜多爲壽嚴顏。兵廚美釀纔嘉貺。子舍清吟繼寵頒。詩酒而今諸素嗜。更兼春雪滿羣山。

張君枉道顧予。因書短篇以答來貺。

煌煌肉食有高冠。附者如馳順坂丸。吾子與時誠異嚮。窮山爲我肯相看。更煩溢幅投瓊珠。自媿無門借羽翰。努力壯年求祿仕。而今行路倍云難。

某前日以鄙詩敘謝。通判國博特垂寵和。謹復依韻上答。

夫子文章却異端。橫流遏盡見平湍。間於風雅能臻極。粹甚圭璋不假刊。累句輒嘗論盛美。賜篇還與作榮觀。起予自媿無商學。何敢言詩向杏壇。

送同年周濤赴吉幕

廬陵風物素稱繁。幕府雄誇列郡間。從事行才詩筆健。平時無警檄書閒。清吟良足償風月。曲宴應頻醉警鬢。行矣功名及年少。未宜留意屬江山。

和通判國博和金華著作陪知府少卿遊北山韻

盛府年來訟緡空。等閒深入亂雲中。驚禽引避前驅旆。寶刹幽尋數畝宮。飛蓋塞塗溪影雜。行歌聒地谷聲通。東陽屈指風流尹。前有休文後有公。

早秋喜雨

風吹早葉作秋聲。涼氣微從兩脚生。赤地黃埃歸一洗。寸心遠目覺雙清。乾坤應救街前暘。黎庶如逃釜內烹。我喜南窗無俗物。葛衣飄灑體還輕。

東陽九日寄浦江同寮

重陽獨步上層巖。目斷吾疆尙載瞻。人世只能愁杜牧。菊花豈解憶陶潛。唵無舊友辭多感。飲爲佳辰量倍添。旅宦七迴逢此節。旋銷壯歲似磨鎌。

次韻國博九日

秋光未老已風酸。還似春來料峭寒。酒瑤莫辭今日醉。人心況是在時懷。佳辰從古逾金重。遠岫登高見黛攢。且學牧之開口笑。休因菊樂淚闌干。白傳有眼看菊。樂重陽淚之句。

東陽吳氏昆仲並薦詣闕

予昔嘗推二子能。試籍每出輒嗟驚。文章即日開鵬運。兄弟同時醉鹿鳴。樂善自憐心不負。知人獨喜眼偏明。來春早附登科錄。甲乙應聯舊姓名。

題公節醉鄉亭

莫向醉鄉尋畔域。古今容盡太平人。沈酣天地來同處。脫略衣冠去卜鄰。一境斷無車下土。四時惟有甕頭春。虛亭未敢從君飲。猶欠陶公漉酒巾。

冬末郡學感懷和韻

我向榮塗倒足行。折腰尙可代深耕。嗟君二紀差高第。猶爾三冬伴後生。壯志幾多成墜鶴。明年四十趁啼鶯。金章袞袞從章布。窮達何時不遞更。

書吳江垂虹亭

千尺危橋跨浪雄。壓橋虛閣勢凌空。直疑有路通銀漢。又訝橫天臥玉虹。盡挹江山歸醉目。獨開懷抱向清風。却嗟景出天隨後。不得當年一詠工。

登陸氏書樓

塵上長愁舉眼低。轉身今喜近晴霓。天邊牛斗開吳墅。鳥外山川走越溪。擬解醉冠從此宿。恨無健筆爲君題。牙籤繞架藏書滿。知與青雲別作梯。

依韻和答陸革進士招飲池上詩

主人愛客掃林亭。天影波光相與明。蝶傍池邊飛舞慣。鳥從花上往來輕。滄浪傲世不復羨。鷓鴣妬春惟欲鳴。能趁繁枝開熟釀。先拚黃帽爲君傾。

送張叔毅北歸

公子姓張天上。有少年如誼洛陽。無滿編秀氣同歸楚。後夜文星不照吳。雲密蛟龍閒未試。霜寒鴻雁急相呼。賢昆學士有詩還促知君懶愛平湖綠。白日聲名會早圖。

送范君武

謫仙放蕩來江東。醉吟三見江花紅。吳兒聚觀玉勒駿。越女一笑金錢空。筆端靈文落彩鳳。席上古氣舒長虹。飄然又趁白雲北。別語有盡情無窮。

禡部集卷七

七言律詩

依韻和令綽兄弟春日出郊

春色纔從野外知。柳陰花氣煖霏霏。出林啼鳥逢人住。掠路游蜂傍馬飛。薄宦塵埃空自哂。長吟風物阻相依。弟酬兄唱饒才思。珠玉同攜滿袖歸。

依韻和張叔毅讀柳先生文

先生蕭瑟半塗休。一跌青雲不再收。名歷班行來衆毀。筆鏗造化起天讎。王章黨破誰爲地。柳播風殊願易州。廟食羅池今尙否。滿編遺韻掩鳴球。

呈陸革進士

魚沫遇窮能一煦。鶯聲得意亦相求。近來無復友朋義。獨善頗爲魚鳥羞。今日指心論皎皎。明朝掉臂逐悠悠。世間唯我交夫子。憂喜同懷二十秋。

遊華藏寺

我今作邑水雲鄉。一到猶疑換俗腸。況在塵區正紛汨。乍來法界得清涼。松筠鎖霧姿逾秀。樓閣摩霄勢欲翔。更卽高僧叩空理。功名富貴盡毫芒。

書吳江垂虹亭

千尺危橋跨浪雄。壓橋虛閣勢凌空。直疑有路通銀漢。又訝橫天臥玉虹。盡挹江山歸醉目。獨開懷抱向清風。却嗟景出天隨後。不得當年一詠工。

登陸氏書樓

塵上長愁舉眼低。轉身今喜近晴霓。天邊牛斗開吳墅。鳥外山川走越溪。擬解醉冠從此宿。恨無健筆爲君題。牙籤繞架藏書滿。知與青雲別作梯。

依韻和答陸革進士招飲池上詩

主人愛客掃林亭。天影波光相與明。蝶傍池邊飛舞慣。鳥從花上往來輕。滄浪傲世不復羨。鷓鴣妬春惟欲鳴。能趁繁枝開熟釀。先拚黃帽爲君傾。

送張叔毅北歸

公子姓張。天上有少年。如誼洛陽無滿編。秀氣同歸楚。後夜文星不照吳。雲密蛟龍閒未試。霜寒鴻雁急相呼。賢昆學士有詩還促知君嬾愛平湖綠。白日聲名會早圖。

送范君武

謫仙放蕩來江東。醉吟三見江花紅。吳兒聚觀玉勒駿。越女一笑金錢空。筆端靈文落彩鳳。席上古氣舒長虹。飄然又趁白雲北。別語有盡情無窮。

依韻和鄭中立祕丞將替寫懷

宰邑優游不足爲。傳家事業復能持。政兼子產那專惠。學近康成最愛詩。百里耕桑增日課。三年閭井見風移。襟懷洒落恬榮進。清節從來畏衆知。

和知府王給事官舍北軒新竹

子猷雅愛此君深。清白傳家直至今。有似致身憐勁節。更應待物並虛心。閒來點筆書新粉。醉後移牀傍細陰。分到渭川青玉種。嚴公宅裏許同吟。杜甫有嚴公宅同詠竹詩

得叔毅書

故人消息苦難眞。終日吳天望楚雲。黃鵠不知何處舉。新鶯應似此中聞。舊來飲量還能幾。別後詩才轉不羣。忽遣長髯馳短札。數行千里贈殷勤。

別林仁祖御史

論交鄉里各兒童。三紀相看兩鬢蓬。孤宦無資元附驥。故人得意近乘驄。秦儀而激殊今日。管鮑心知有古風。歸興嚴程何太急。片時車馬復西東。

晚鶯獻都官

自恨飛遷出谷遲。東君不是故相遺。園林縱許容羈迹。蜂蝶還應笑後時。休恃綿蠻能巧囀。還須冷落守空枝。春風著力年年在。未必羽翰今便衰。

附都官見答

每到年年二月時。選喬常向最高枝。春教綠綺調喉舌。天賜黃金作羽儀。無限園林皆占遍。幾多蜂蝶競相隨。除棲禁苑宮花外。更得飛鳴近鳳池。

再和都官見答

離幽便欲趁芳時。越分非能守一枝。多語羞隨禽反舌。逢辰強學鳳來儀。故林有約依前去。落絮無蹤逐處隨。若得東風聊借力。免教燕燕競差池。

附湯七秀才見和前作

占此青春未是遲。天工造化豈能遺。既教喉舌清能囀。何事飛翔始得時。庭檻暫須隨乳燕。禁林終穩擇高枝。回看尙未遷喬者。羽翮摧殘更嘆衰。

湯七秀才見和再和

清吭臨風囀較遲。春光相背去如遺。名園已失堪棲處。幽谷何如未出時。早恨狂蜂偷好景。更和微雨宿殘枝。齋庭健翼飛雖晚。一舉青雲笑我衰。

送施野夫赴舉

胸中六籍收高誼。手撫辭章應禮闈。不飲故人相別酒。恐沾壽母自縫衣。吳河擊棹開深凍。汴日迎鞭弄短暉。四十明年方得仕。平生未與古人違。

秋試甫期。輒成短篇。呈馬公節。裴進士光世。

妙譽相高。聳一鄉士林。注目看軒翔。玉蹄駿欲騰先路。光世金距雄思擅舊場。公節只待秋闈排甲乙。穩攜曉硯寫文章。如今老將雖無勇。憶拔螽弧尙激昂。

依韻和李持正晚晴出謁王子高馬上口占之作

謫仙醉跨玉鯨鱗。夷甫名談喜更聞。照眼暖花開野日。入懷晴氣散江雲。塵埃洗去人家好。空闊飛來鳥翼勤。莫望帝鄉頻感慨。世間隨處有珍羣。

次韻公勝曉起對雪

向曉寒威覺倍濃。雪霏紛糅冷兼風。亂裝瓊樹千林密。疑瀉銀河一夜空。鷗鷺失羣吟景內。乾坤同色醉眸中。青山瘦馬凌朝出。翻羨袁安得臥窮。

次韻公勝早梅

昨夜寒梅忽一枝。早如常歲合開時。欲冬天地恩先及。未雪園林色易知。世眼已教容易賞。曉風何用再三吹。若論霜菊無多晚。只此春葩苦較遲。

予官將滿。婢子始植小柏于堂下。因感而書。

孤根初掘出巖隈。赤脚殷勤手自栽。翠葉未成官秩滿。清陰別待主人來。堦墀好養今朝操。梁棟須歸異日材。猶勝天桃情意薄。劉郎去後始花開。

暮春偶書呈才甫慎微

解去銅章尙目餘。一春文酒會全疎。無機自好親鷗鳥。雖弱仍甘下鱸魚。樂事易空如委蛻。流年難挽甚奔車。酒徒文友心期在。任有臧倉毀子輿。

予解邑過杭遇介之學士謁告南歸

同時兩郡冠鄉書。屈指俄經一紀餘。顧我冗塗移蹇足。羨君榮路駕奔車。方從解綬辭巖邑。已見飛章厭石渠。自古蓋棺人事定。未應今日較龍豬。

依韻和楊尉郊外懷鄉

策馬長郊羨子真。獨贏風物與詩論。驚飛鴈鷺投前澗。歸去牛羊識舊村。暴漲溪聲聞遠近。久陰山氣亂朝昏。異鄉我亦嗟遊宦。莫說啼鶻有怨魂。楊詩有回望鄉關在何處更聞杜宇轉凝魂之句

鄭君天常有詩貽楊尉因次韻以贈

屢屨名場歲已高。此行誰贈一綈袍。久從客踏嗟重趼。獨對秋風感二毛。遊倦幾漫許都刺。憤深將廣楚人騷。而今薦口難開吻。第愛窮途節可褒。

彭及之邀吳仲源楊公濟與某夜會望湖樓獨某後期爲關所隔偶成四篇以呈諸君

月底雲樓一水湄。天光湖色兩瑤璃。樽前更坐清風客。筆下爭翻白雪詞。物外骨毛應自爽。世間笑語不容追。千年庾亮胡牀後。此興今人亦未衰。

諸公愛月欲狂顛。脚踏花欄手擘牋。那作常時揮綵筆。直須飛句上清天。豈無劇笑驚山叟。應有妍詞調水仙。獨我清宵塵滓甚。亂蚊聲裏汗膚眠。
波射飛樓縹緲間。雲梯豈合在塵寰。金樽倒盡星垂地。玉滴書乾月過山。檻底吳僧空仰望。座中蜀客懶西還。我遭魚鑰無情甚。只許吟魂夜度關。
故國英雄已寂寥。飛樓氣象自飄飄。天邊鳥翼愁簷額。雨後虹光轉檻腰。直恐笑歌驚白日。却憐身世近青霄。雲梯縱險容人上。始信明河亦有橋。

再寄元真宮讀書

讀書曾寄此軒頭。官路歸來十二秋。文酒故人無一在。蓬蒿荒徑有餘愁。差池歲月辜金印。憔悴乾坤復布裘。卻掃塵埃張舊榻。雲中雞犬笑淹留。

二月二日作

江上初逢社燕歸。青春二月色猶微。茸茸屐底草烟合。冉冉樽邊花霧飛。蹭蹬榮圖雙鬢改。蒼茫樂事寸心違。紫絲結鞵誰家子。馬躍東風試薄衣。

將渡揚子風雨忽作

南徐景物古愁人。薄宦扁舟更水濱。不識濁醪傾北固。獨隨寒雨出西津。連天風浪聲兼厲。當路鼉鼉氣亦振。吾道屈伸非一日。世情未要責江神。

登梵天上方

廊腰偃月勢環遭。秋寓澄明照一毫。樓檻轉身侵白日。海山隨眼沒驚濤。泉枯碧甃鱗形遁。屋跨蒼崖鳥翼勞。屈指舊遊今二紀。新愁爛漫入風騷。寺有靈殿井道鑿在焉

舟過三郡率值風雨呈同行沈氏昆仲

冥冥細雨濕高秋。花底歌前也合愁。烟樹幾株疎兩岸。風帆一夢過三州。生涯未解謀根固。官路那能免葉浮。却羨鄰船樽有酒。不妨弟勸與兄酬。

依韻和公濟寄仲靈禪老

藤州大士兩眉厖。萬卷叢身寄一窗。詩力健能支倒岳。詞源湧可截奔江。高名聳動朝中士。舊隱荒蕪嶺外邦。想像孤風獨未見。何時能使片心降。

贈承天月長老

幾年巾屨四方遊。倦足還逢勝地留。電迅禪機超達磨。雲閒詩意等湯休。絕塵貌與烟霞古。疊石心存岱華秋。此軒累石爲山今我取師觀所嚮。豈嫌儒墨不同流。

承天元長老棄本寺寄淨慈以詩戲之

城裏叢林一唾捐。收身微笑寄湖邊。此生直欲看山老。不住真爲出世賢。野屐懶穿雙露脚。雲裘嫌重右披肩。人間萬事都無著。獨與風騷有愛緣。

詩贈寶應禪老溢公

或來文室問師禪。師解臨機示意筌。雲在虛空寧有礙。月當陰晦亦長圓。更無餘事牽塵想。猶有能醫結世緣。瓶錫憧憧參祖學。幾人垂老得林泉。師被府令駐錫此山

前日奉和仲靈禪老春雨詩。復辱見答。走筆依元韻酬之。

千年支許事如新。欲作前遊漫歷旬。雨帶黑雲障俗客。猿呼飛鳥伴幽人。從容劇論知何日。感激佳篇慰此辰。四海聲光非鑿齒。道安名重若爲親。

觀嘉祐南宮奏名

主司撥馬選龍媒。二百珍羣奏籍開。皎皎公衡垂日月。儀儀士類望風雷。誠知至鑑無遺照。那免良工有滯才。鄉國幾人同應詔。只將春色與關裴。

寄題殊公禪老黃雲閣二首

大士當年密行成。山居黃色有雲生。黃雲已共斯人去。飛閣猶爲此地名。欲到塵埃先擺落。縱觀氣象亦崢嶸。誰云瑞應難追復。禪老而今祖意明。

人悅禪翁巧結廬。更營飛閣取幽虛。溪山雨後翠欲活。樞檻風來清有餘。龍象幾年成佛界。猿猱深夜雜僧居。還如夢得聞涵碧。誰寫丹青復寄予。

經故明靜師支離堂

支公昔講支離學。堂上無容坐客氈。往日衣冠今尙否。經春几席自蕭然。談間精義門人記。身後清風嗣子傳。一紀宦遊尋舊社。空將感涕灑塵編。

戲呈宋周士

臘去垂垂凍欲消。春光未動思先饒。最宜才客臨歌席。更看佳人轉舞腰。一笑勞生應有定。三冬薄宦獨無聊。蘭臺侍從風流裔。合爲行雲賦此朝。

洪君然太博以元日刺字交馳卒不一見作詩相遺依韻和答

知君元日趁鷄行。雙觀雲邊聳百常。拜表歸來乘逸興。跨鞍相就攪吟腸。還同皇甫尋僧孺。却笑山公顧葛強。我亦及門空刺字。不容高論聽琅琅。

暮春感懷

雨聲日夜催春老。不顧愁人鬢欲華。堂上自來相熟燕。樹間猶有未飛花。詩篇閒裏曾無數。酒盞生前亦有涯。傳語東風且從款。蒼顏更畏數年加。

賞春

到老能逢幾席春。直須飲量強增分。子素少飲吟情無際共芳草。遊思難收如亂雲。還見春風與桃笑。却教人意嘆芝焚。予近喪偶妖紅爛白方爭賞。疎竹休誇號此君。

昨日以鄙詩示王君。遽辱贈篇。過有推飾。輒依元韻奉答。

未有功名與世傳。且驅懷抱向詩篇。昔曾篆刻工童伎。今敢風騷領將權。媿匪窮經臻聖處。妄推聞道在君先。還知苦意微吟否。不已猶云博奕賢。

答章傳道二首

旋刻辭章就禮闈。禁園花在遂空歸。客愁春雪杯間釋。詩句青雲紙上飛。從祖近持丞相印。舊交半著侍臣衣。揚雄未老猶堪薦。忍聽滄洲買釣磯。

夫子詞源湧大江。相逢早覺片心降。日哦李白詩千首。累日獲觀盛編夜獲虞卿璧一雙。昨日辱屢發彩牋移曲几。不知紅燭短幽窗。吟高莫信須窮滯。亦有從來擁節幢。

送呂監簿歸淮南侍下

花邊把酒趁晴暉。春去花空興盡歸。白髮親庭寬北望。青簾客舫喜南飛。京埃袞袞休回首。淮月娟娟好振衣。年少身名當自立。不須裘馬事輕肥。

贈蘇宜甫

謫宦多因衆口讒。猶君戰衄困羈銜。鷹擊羣雀翻遭網。舟駕長風忽斷帆。曾擁貔貅交白刃。肯同兒女泣青衫。有才恐失朝廷意。不日房陵被詔函。

某嘗約才甫遊雙溪。以連雨多事因循未果。辱詩督行。謹依韻和。

共君曾約訪烟霞。欲趁芳時物物嘉。宿諾古人嘗有誠。春遊今我果成賒。眼看日下無窮事。腸斷風前已

落花天氣清明當趣駕。此詩先寄謫仙家。

送宋國叟赴吉州司理

水光山翠一城浮。碧瓦朱甍萬井稠。平日居人皆富庶。少年新掾更風流。傳家妙術觀尊府。決獄能聲擅劇州。利刃有餘清興足。不應詩句廢江樓。

依韻和正老自嘆之什二首

妙年爲學恥迂疎。直欲聲光擅八區。已是宦情嗟澹泊。可堪世態較錙銖。不調台鼎行吾道。便翼天兵戮汝孥。出入功名當若此。自餘瑣細盡非夫。

我無尺地可耕鋤。君有高田占具區。正老吳門有上腴數頃若論生涯有厚薄。獨於宦意等分銖。壯年未建鴻毛利。寸祿聊甘稚齒孥。不學庸庸自持者。高官空食上農夫。

贈辟疆

人譏徐子迹飄零。我愛文章輔六經。大筆疑爭造化力。幽吟難遁鬼神形。良金縱毀剛無耗。寶劍雖埋氣自靈。進則臯夔退荀孟。莫容得喪擾中扃。

依韻奉和王平甫學士寄元內翰詩

蓬萊仙闕地深沈。視草讎書此盍簪。禁漏傳聲來閣外。宮雲曳影過廊陰。能詩摩詰淹儒館。未相微之在翰林。馬躍秋風出閭闔。片時相失遂成吟。

送紫微沈舍人守越州

翁子懷章未足多。會稽歸日已蹉跎。舍人緣髮垂金印。院吏朱衫導玉珂。去國忠心傾斗極。過鄉喜氣壓江波。君王許便雙親養。奈渴黃麻紫誥何。

依韻和酬閩州劉侍禁季孫見寄

別來雙鬢一衰翁。近喜劉郎信息通。劍氣未閒頻犯斗。賦聲無用尙摩空。君頃以能賦稱太學而竟屈於不得科試傳聞蜀道躡天上。見說城南冠閩中。杜子美有閩中勝事可腸斷閩中城南天下稀之句山水縱遊那覺久。清霜兩度變丹楓。

人日立春輦下作

樓上滿傾人日酒。更逢春氣到京華。盤擎白玉來生菜。勝插黃金出鏤花。客興紛紜那可數。年光流轉亦無涯。天邊梅柳應相笑。兩度東風不在家。

依韻和鎮叔送元宵之什

一夜雲衢火樹空。照人唯有月華同。却思廣陌追遊處。都似南柯夢寐中。未分園林辜樂事。況栽桃杏有春工。可憐此景何時再。直待明年歲起東。

席上呈正老

去年贈別折寒梅。盡道行人不再來。今日樽前成邂逅。大家花下且徘徊。經春雨脚無時斷。浮世眉頭幾度開。莫待明朝離闕後。空將餘恨寄吟杯。

送鎮叔

三月將交雨細時。餘花撲撲柳飛飛。已於樹底聞鶯恨。更向花前送客歸。暗綠幾行迎去馬。亂紅無數落征衣。傷春惜別鍾吾輩。此際寧容瘦骨肥。

次韻答正老

幽權閒憶去年時。飲量人人灌漏卮。我更典衣邀淺飲。君猶刻燭賦新詩。由來世事都無定。再結朋遊未可期。一紙清風惠佳句。慙慙勝寄隴頭枝。

依韻和正老暮秋郊行感事

秋郊物物作秋容。目送橫天一鷲雄。更遠更疑山隔霧。或飄或聚葉隨風。對時唯恐朱顏改。遣興除非白酒充。感事子真成麗唱。恨無佳句敵才翁。

再和

有客秋郊曠望中。更憑佳句發才雄。牛羊飽食眠平野。鷓鴣乘時擊迅風。倦目幾隨殘照斷。渴腸惟藉濁醪充。登臨不用頻興感。憂喜能忘是塞翁。

再和

我行平野覽秋空。物象吟懷覺兩雄。遠水有時明返照。疎林無限戰西風。京坻相望農收足。廬井多權歲計充。亦向此時追樂事。歸來倒載效山翁。

依韻和答公諤郎中冠氏遙中偶成

滂滂黃埃接大河。驅車底處覓陽和。參差花信春將半。惱亂詩情日轉多。樂事恍如初覺夢。年光撇若迅流波。馬蹄莫放歸時緩。知有佳人聽玉珂。

依韻走筆和答徐無畏見招

憶初識面越庠時。餘教嘗蒙覺後知。早念兒童能刻賦。晚逢夫子許言詩。從容江介心方壯。蹭蹬京華鬢已衰。道舊不須親握手。滿篇往事略無違。

馬上口占呈記注李才元學士

一時聞望絕朝裾。幾歲文章動直廬。鳳尾新批天子詔。螭頭看載史臣書。故關卽路嚴霜後。曉殿初班瑞雪初。蜀道歸時須六印。不應駟馬擅相如。

送曾元恕太祝赴漢陽監征

漢江山色秀蒼烟。山擁江光入馬鞭。行思欲飄飛鳥外。別顏空慘落花前。勉旃關賦那終歲。好在家聲幸壯年。鸚鵡故洲應寂寞。得無新句發晴川。

次韻通判張靜之郎中席上對客

一飲眞須盡百杯。異鄉懷抱酒邊開。田園幾日能歸去。軒冕浮雲亦儻來。交態與誰論淡水。宦情空自學寒灰。何如席上張公子。白雪辭兼郢客來。杜子美贈張翰林有天上張公子之句。

寄秦倅呂四丈職方淵

丈人官意靜如山。五十朱衣鬢未斑。富庶謳歌歸別駕。太平談笑服諸蠻。熊羆一兆高門後。鴻鴈連飛絕塞間。愛弟翰林時帥邊關莫學馮唐終蹭蹬。功名猶好出秦關。

寄保安軍楊公濟判官

高吟絕塞十年前。醉筆纔停萬紙傳。麟閣主人降健句。雞林官長購精篇。舊遊散落今誰在。新感縱橫日自憐。肝膽不同軀幹小。幾時獻畫請開邊。

依韻和張君儀職方城上觀雪

重城雉堞粉相圍。亂片情多故點衣。浩蕩關河無表裏。微茫草樹有光輝。冷侵客鬢雙蓬短。急伴年華一箭飛。卻憶水曹詩句好。羣鴉接翅傍昏歸。

會故人集崔侍郎園池

貳卿園沼壓關西。上相篇章絕景宜。舊日宮牆流水過。至今苑池畫圖知。孤花春去猶臨岸。野蔓晴來欲占籬。